

# *NROWE NIMOONE MULUKU*



Mukilaathiki. Mukilevelele wira yeeyo, Munna Borders, masi waahikhala mwaha mmosa w'oxankiha iwe, aakhwa ni kankuru, ni kaahaana pahi orowela. Paahi...KooSuwela wira munookiswamiha mwaha wa yeeyo. Tivo, khiva-mulattu. Waanikinana wiileliwa. Kaarookhala kilipelelaka vakhani paahi, ni okumana n'apatthani kamosa-kamosa, vano nto khurawela mwah'ola onammalaru oruuiwa, vootepa, saana, tivo kaahaana orowela vowaakuvexa.

<sup>2</sup> Nkinsuwela tu moota wo opacerya, oxekuw'ola. Miyo kaamuupuwela mphironi nno, "Exeeni kikhanly'aka ohimeerya mu—muthukumano w'atthu ntoko ola?" Ola muthukumano wa epaphelo yooxeerya wa miyo. Ni nkinihimya yeeyo mwaha wo wira kiri ohoolo wanyu. Kinihimerya okhala wira enikhuma mmurimani mwaka. Nto kintthuna wira khula mmosa w'arumeyi ala esuwele wira kinnitthokelela ola okhala mmosa wa mithukumano saka suulupale kintonko aka okhalana. Eyo ekeekhai. Mwaha w'okhaliheryana wanyu wooloka t'utepa waya oreera. Kihoona imaara okathi waakhal'aya...Kaanikhalana anci-ene mmuthukumanoni, okhaleliwa wuulupale, masi nkinatoko wona muthukumano kintonko aka okhalana kookhalaru ntoko opatthana w'osivelexa ovikana kinikhalan'aka varyari vanyu nyuwo axinna. Muluku ooreeriheni. Kinroromela wira ikereja sanyu sinimunnuwa ni wuncerereya mpakha vahinrow'aya okhala emalelo aya. Kinvekela wira Muluku ookhaliheni mmutekoni mpakha Owo orwa. Nla ti nivekelo naka na xariya wa nyuwo. Ni ki—kinnikhalaka hata okathi waakhalan'aka arumeyi anci-ene ekhaliheryaka, ntoko imaara sikina wAfrika, oHintiya, siiso, okathi waakhalan'ahu imiya sinci-ene vanikhuruni nimoso. Masi nnakhala okathi ene ntoko, voowooneya ntoko, ottuli waka, murima mmosa ni wiiwanana omosa. Eyo ti yooreera vekeekhai. Miyo kinnixukhurela yeela, axinna. Ni miyo vekeekhai, etthu p'itthu kaakhanly'aka owiirelakani, muupuwele paahi wira miyo ka munn'inyu. Ohiyu khonkhalaxa wooriipela, epula khenrupaxa, moone, kinimwiira etthu p'itthu enwery'aka wira kookhaliheryeni oroiha ottaiwene Ehapari yooreera ela yuulupale wala owiirelani etthu. Muluku akhale ni nyuwo mahiku othene!

<sup>3</sup> Kintthuna-tho kimuhimyeere, munn'aka mwaamukhaani va, Roy Borders, miyo kinoomalaru omusuwela Munna Borders okathi vakhani. Miyo kweekwe kaanitthuna omuphwanya mutthu aarowa okitthokiherya mithukumano. Munna Roy aakhala ntoko orweela yeeyo. Owo kahiyu murumeyi. Owo mulipa a nakoso. Miyo koomuhiya otthokiha mithukumano

miili wala miraru, wira koone paahi etthu aarow'awe wira, nto ela ti yookhumela aya: wiiwanana omosa. Nto voolimaleleya murumeyi arwa wootthokiheryani mithukumano, ahe, kweekwe onnikhala murumeyi mukina orina etthu ekina, ni owo ookhalana mwiixuttiho wala—wala etthu ekina owo—owo onthun'awe wooniherya. Nto onookela eriyari ya nikhuru n'arumeyi ni wooniherya mwiixuttiho, vano—vano munikhala mmukattiyamihoni. Munnona? Tivo, vanreerela mutthu ohikhanle murumeyi.

<sup>4</sup> Ahiiso, kivolowaka, ookhala okikon'he, khwira, “Munna Branham, nyuwo mwa aYesu Paahi, nyuwo muniira mpantta wa Yesu Paahi?”

<sup>5</sup> Miyo khwira, “Nnari mara.”

<sup>6</sup> Nto khwira, “Ookhala ohimye wira khamunaamini olavula ilavulelo.”

<sup>7</sup> Miyo khwira, “Awo khankisuwela oratteene, ti yeeyo tu. Vekeekhai, kinnaamini.”

<sup>8</sup> Vano, ni Munna Borders vekeekhai mulopwana mmosa ooreera murima muKristu, onvara muteko wooreera saana. Ni vekeekhai kinnimuxukhuru Munna Borders mwaha w'okilattula. Owo khoreerane mixankiho, mikattiyamiho sinci-ene, masi owo o—onivara muteko wooreera. Muluku amureerihe Munna Borders, ti mavekelo aka v'exariya.

<sup>9</sup> Munna Wagner, kinoona wira owo ori ntoko mukhulupale, kookupali. Owo mmosa kimmukumanan'aka kweekwe, a ekomite. Muteko wooreerexa, siiso ntoko siiraly'awe okathi mukina, wooreera. Owo aarookilattula okhuma owaani wira kikhale ni yoowo, okhala owannyawe. Vekeekhai miyo kaanithuna vanci-ene wira siiso, kaaniwerya okhala ntoko wona siiso. Kaahaana okhootta okhala wira kuupuwela wira khino, ni muthukuman'ola wooreerexa, kaanithuna orwa wa khula mmosa etthoko anyu, moone, kaanithuna omuthotola khula mmosa a nyuwo. Ni miyo—miyo kaanittitimiha moonelo anyu, ni kookupali wira Munna Wagner onnisuwela saana moota yaary'aya, moone. Wira miyo . . . kaaronwe—ru owaanyawe Munna Wagner, kaamutthuna orowa wa khula mmosa a nyuwo siiso. Kaahipheyerye wira yeela, Munna Wagner, nihiku nlo epantte ekina, epantte ele ekina, kintthuna iyaakha ekonto emosa, khula mmosa, ni khula mmosa a nyuwo. Tivo ninoorowa okhalana okathi wooreerexa Weiwo!

<sup>10</sup> Munna Toy, owo vekeekhai, owo paahi . . . Nkinoona moota oniir'awe itthu sinci-ene ekwaha emosaru, masi vekeekhai onniwerya wira sinci-ene. Kaahimoona nihiku nikina voolyani wa voosiisu w'Alipa a Nakoso, moota aavar'awe epantte ya mulaleyi, tiyaakono, mulipa-oorehererya, ni khula etthu yaakhumelela, ni aaniilipiha wira sothene. Owo onnaaphenta Apwiya. Kaahikhalana mureerelo w'omusuwela

mwaar'awe, ni omoona mwan'awe mwaamuthiyana oophenteya n'aiy'awe yiipaka. Vekeekhai yaari yookuxa murima. Miyo koomuhimeerya, okathi vakhani ovinre, "Khivantthuneya awo okhalasa owaani, evaraka muteko omutekoni wa khula nihiku. Yaahaana okhala ota vapuwani w'olaleya echapari nipuro nlo, ni soovaha suulupale siisaale."

<sup>11</sup> Moone, khula mmosa ohaana, kinroromela wira nkimmuhiya hata mmosa ota. Muhan'ole onrumiha epiyaano, alipa-ooowiipa, ekoraale, ni othene ankhala, vekeekhai ennikisivela ni murim'aka wothene.

<sup>12</sup> Ni aximiravo va, Gene ni Leo, onnaasivela wooniherya moonelo aya wa nyuwo, nave, mwaha w'othumaka ifiita ni iliivuru, ni epantte awo arinas'aya okhapelela. Miyo kinoomala-ru waakumanana vamukhora, okathi vakhani ovinre, khwaaleela wira kaamuhimya moonelo aya wa nyuwo athu. Awo vekeekhai annixukhurela sothene mwiiraly'anyu wira mwaakhaliherya ni mweettelo muulupale wa Muluku.

<sup>13</sup> Nto vano ela enikhuma wa miyo, mwan'aka, amwaar'aka, ni mwaara a mwan'aka, ni othene. Anciene, mutthu onkhala iiraka, "T'ani Munna Branham muthiyana?" Owo ti mwali mmosa oowiisumaaliha kitonko aka omoona kookhalaru. Oh, wulu!

<sup>14</sup> Munna Art Wilson, kookupali wira nyuwo othene munnimusuwela. Kookupali wira aari munna...Nnari, aari Munna Jewel Rose, ohiyu umosa, iirale, "Munna Branham muthiyana onoowela vaplataforma," ni aahala omaala murima. Owo paahi...Owo vekeekhai t'owisumaaliha.

<sup>15</sup> Oophentiwa, vakhala wira khamunihileya, nvenye minuutu mmosa paahi, wira mutthu amoone mwali mmosa oosivela kimuthenly'aka. Vaareera. [Muthukumano onooa ikuphi—Mol.] Maathi aka, mwaara a Billy, Loyce, nvenye, Munna, okathi vakhani paahi. Owo ti mwaara a Billy, [Muthukumano onooa ikuphi] ni maathi aka.

<sup>16</sup> Anciene a nyuwo muhiiwa sa Joseph. Khamwiiwale? Athu a wAfrika aamuveleeliha naanaano ekhasako ya makhuli manciene. Miyo kaahimoona iyaakha thanu na mosa ahinatthi orwa, okathi meetiku aahimaly'awe wira khinaarowa-tho okhalana mwaana mukina, khinaawerya okhalana. An'ihu yaahaana okhala a sesariyaana. Ame aka, athu aya amwaar'aka ti siiso, awo, axaan'aya othene t'asesariyaana. Nto Apwiya khukileela wira kaamurowa okhalana mwaan'ola, okathi meetiku aahimaly'awe wira khivaaweryaneya wiiriwa, khwira wira khivaaweryaneya wiiriwa tu. Miyo khwira, "Enimwiireya, khula enamuna." Nto hiyo khulipelela iyaakha xexe, vaamanly'aya orwa yoowoona wira kaamukhalana mmiravo, ni kaahaana "owmiihana nsina nawe 'Joseph.'"

17 Nto, nuuvira yeeyo, aahikhala mwaana mwamuthiyana mukina aayariwe. Athu othene yaamukitheya, ni wira, “Mwaatthuna wira ‘Josephine.’”

18 Miyo khwira, “Nnari. Kihimye ‘Joseph,’ ntoko mmiravo.” Owo khino onookhala voopuroni vaka karowa vale, Yesu apisa vale. Nto iyaakha xexe sikina; vano meetiku aahikupali wira khaarowa-tho okhala mukina; iyaakha xexe sikina, Joseph khurwa.

19 Kiireke, maama, munoowerya omuwarela minuutu mmosa paahi. Kintthuna wira awo yoone etthu...Mwanamwan’ola ookhalana erooho y’oprofeta mwa yoowo. Ni owo...Nvenye vakhani paahi, Joseph. Owo vo. Vaareera. [Muthukumano onopa ikuphi—Mol.] Owo ori ntoko ame awe, owiisumaaliha.

20 Kinimooleelani etthu yaakhumelenle. Hiyo naarookhuma...Owo orina iyaakha xexe vano. Masi okathi waarin’awe tthaaru, hiyo naarookhuma. Nto owo khwira, “Paapa?”

Nto miyo khwira, “Ayo, oophentiwa.”

21 Owo khwira, “David...” Owo ti mmiravo aarakanle, vano khuvonihiwa, mwaana a Mwenye Wood onkhala vakhiviru ni hiyo. Khwira, “Miyo kaari...koomoona omonre-ene vamootani.” Owo khorina hata moota. “Ni khuvulaliha mwetto awe, owo khukhera ikuwo sawe epantte ya moonoo woolopwana.”

Miyo khwira, “Waari woowi yeeyo, oophentiwa?”

22 Khwira, “Ohitto ephiro ele okhuma vale onkhal’ahu.” Nto mahiku mararu ohoolo waya, mmiravo mmosa khurwa akhumaka oKentucky, eettihaka moota, vano David khurwa attharaka ephiro khuvulala epantte ya moonoo woolopwana ni khukheraya ikuwo sawe, siiso ntoko Joseph oonaly’awe.

23 Okathi omuvaherenry’aka w’Apwiya, voosiisu, yaahikhala axinamwane anci-ene yeemelanse-ene, ni yaahikhala aximai ni yaawo waltaari. Okathi omukunx’aka Joseph mmoononi mwaka, kihupuwelaka etthu kaahimy’aka, miyo khwira, “Joseph, mwan’aka, nyuwo mwa profetaa.” Nlo ti nivekelo naka, khula enamuna, ni kinnaamini wira enookhala, wira, Muluku onookuxa sothene Owo otonko awe okivaha, ni ancererye imaara piili, ahele mwa mmirav’owo, nto karowa vale owo onookhala opuro aka.

24 Billy ti mpatthani aka. Miyo koomunnuwiha; ame awe akhwiye owo orine-ene miyeeri muloko ni mithanu na miraru; nto kinikhala tiithi ni mai, soopiili, wa yoowo. Masi enkhala ntoko khorina wiihaniwa wira akhale mulaleyi. Owo t’owiisumaaliha, oowuuliwa muru, ni siiso, sothene ntoko ame awe, ehaaya. Masi owo onnikhala mukhalihieryo muulupale wa miyo mmuthukumanoni, ’okhala wira kinnimuroromela, omukuxa omurowana iwe ni omuvaha muteko muulupale.

Moone, muteko wa ittikitti sa mavekelo muteko muulupale wo othokorerya. Mutthu onivarela owo ni wira . . . Mulopwana mmosa emaaara emosa iirale, “Kinimoovahani itoolare imiya thanu mwaahelaru amwaar’aka vaplataforma.” Ankhi eyo yiiraneiyey? Vano exeeni yaarowa wira Eroho Yowarya? Billy onnisuwela saana osuwela ohikhalakhala eereryaka yeeyo. Owo aamusuwela wira kaamusuwela owo amalakaru ophiya vaplataforma, tivo, Apwiya yaamuupulula. Mwaha wa yeeyo owo—owo ahaakhanly’awe wiiraka, tivo nto hiyo othene ninnooxukhuruni.

<sup>25</sup> Vano nto wa mulipa-oowehererya, mulopwana oolakeya onnikhaliherya vamukhora vale, ni kinoona wira owo ori ntoko mulipa-oowehererya va, wala etthu, wala kwarta vamukhora. Ni w’atthu othene anitthunihenrye okhalana autitooriyu ula oreera, vannikirikela ohimya wira “kooxukhuru” vaniphivery’aya. Vekeekhai kinnixukhuru, ni sothene sikhanel mwa inamuna sothene, ni sothene siiriwe.

<sup>26</sup> Vano kooleeliwa, Munna Borders, okathi vakhani ovinre, wira ihaakheliwa soovahiwa sa mphento wira kinnyiwe. Kinnixukhuru saana yeeyo, ni ni murim’aka wothene. Kinoorumeela, vooreerela vansuwel’aka, mwaha w’Omwene wa Muluku. Vano, kehiyo ele ensuk’ahu nno enihimyaxa, t’ile enveleelih’ahu. Ni kookupali wira Muluku onoohelela yeeyo mukontha mwanyu m’Omwene onrowa orwa.

<sup>27</sup> Vano, miyo nkirina prokrama a muraatiyuni. Nkirina hat’etthu y’otumiha. Masi mwakhalakhala mutthunaka nimosa wa maleeso ala wala ovekeleliwa, mukilepele epaphelo oJeffersonville, Indiana, Ekaaxa Postaale 325. Enoorumiheliwa, mmansaka, ni munootthikela oveleeliheriwa. Ni kinnaamini mutek’owo. Vano nto mwathunaru okilikarella, BUTler 2-1519 nookiphwanya oJeffersonville, Indiana. [Nummaru na telefooni noopatiliwa.—Mol.] Tivo, wala mwaahiwerye wuupuwela yeeyo, mukikohererye paahi oJeffersonville, enoolikariwa. Vano, miyo nkiniirela eyo wira kiphwanye vamphwanyaney’anyu, okhala wira kinnikhalanaka okathi wo orika mutthu okaakhulela ipaphelo, ni sikina. Nto vano nkikhalanxe . . . Vaareera, miyo kinniwaamini aprokrama ala. Itthu sothene sinrowa omukhaliherya Muluku, sikhale.

<sup>28</sup> Masi, moosuwela, kinoona ntoko so, wira mutthu a mukereja, muteko aya woopacerya t’ula, ni sanamuloko saya ni soovaha, okhaliherya ekerej’aya. Vakhala wira muniira mpantta wa ikereja iya sooreera sinthoonyeriwa va, mukhaliherye ke ekerej’anyu. Owo ti muteko anyu woopacerya wa Muluku. “Muruuheke sanamuloko sanyu ni soovaha mpaani m’osuka.” Nto mpaani m’osuka, vekeekhai munnisuwela exeeni iyo, ti vaavo vamphwany’anyu yolya anyu. Vano, ti memmo mumphwanyanyu yolya anyu ya erooho, ni muteko anyu onkhala ni ekerej’anyu nto kahi ni namalaleya ntoko miyo.

<sup>29</sup> Ennithukumanyiwa nipuro nlo mmithukumanoni okathi onkhalan'ahu ikampaanya siisa, vaavo munkhalan'anyu yoosuka yaamukhaani wira mukhaliherye, eyo ennikhapelela. Ni kinnooxukhuruni vanci-ene. Ni khula okathi, ikuwo sa mavekelo wala etthu p'itthu ntoko yeeyo, ti ya mahala mara. Khiivo etthu mwa yeeyo nnakhala, hiyo khani. . .

<sup>30</sup> Ni iliivuru sahu, ni sikina, natumiha vale, awo a... Nihaana othuma, ipursento miloko mixexe vakhaanixa ovikana ele enaakhel'ahu mwaha wa seiyo, vano nto hiyo. . .eyo ti, vaavo, sinoohononeya vanci-ene seiyo, ni munooliva opakhiriha ohiya-tho vo, vano sihaana olovoliwa nno n'utumihiwa. Vano, khivaakhanle, khivaakhanle okhummwaka ni seiyo vakhala wira mwaahaana, moone. Masi ninniira paahi mwaha wo wira ti wira noophwanyiheni Mutthaka, wiilipiha wira mukhaliheriwe, yeenyu; vano nto mmuleele mutthu mukina, ni mwaavahererye. Ti yeeyo sikhalenly'aya itthu iya, kahi siiso? Komunismu onnikumiherya iliivuru saya ni soolepa saya, mahala, okhala wira awo ti mweettiheryo muulupale. Miyo ka mutthu mmosa paahi. Kaanithuna kiweryaka, kirine-ene musurukhu wo wira paahi "iliivuru sothene ni itthu sothene, mahala," kaamwiira. Masi nkinwerya wira, kihaana okhalana etthu y'otthika tho n'utthitta sikina tho, wala—wala othuma sikina tho.

<sup>31</sup> Apwiya yooreeriheni. Nto nyuwo munookivekelela, khamunikivekelela? Nto kakhala ilapo s'okhopela, ni mapuro ale ooriipela weiwo akhwiri amphwanyaney'aya khula epantte, animoovirikanyani mwa sothene sinihimy'anyu, okathi onoorika, ittheke sooviha sa olupatthiwa sinooruma, kooheleni mulistani, wala nyuwo okihela mulistani mwanyu, ni kinniwerya wuupuwela okathi orin'aka okumana mutharimulo ole w'akhwiri n'axetwani, ni itthu iwo vapuwani, kinoowerya ohimya wira, "San Jose onnikivekelela"? Muni, munimwiira yeeyo? Nvenxe ntata vakhala wira munimwiira, mwiire, "Kinookhala koovekelelakani." Kooxukhuru. Kooxukhuru, axinn'aka. Kooxukhuru. Miyo kinoorwa eriyari anyu, wira kikhale munn'inyu, ni oruuha. . . okhaliherya oruuha murettele ni Kristu, sothene sikhlanle sooreera wa nyuwo. Nyuwo mukivekelele. Vakhala wira ookhala omuhin'ye aka, mukilevelele, nkinlakela omuhiya. Masi "oxukhuru," wuulupale wa vamurimani ni iparakha sa Muluku wa khula mmosa a nyuwo.

<sup>32</sup> Hiyo nihanle orowa owaani vano, orowa. Kookhalana muthukuamno wa mahiku mararu wu mukereja mwaka yaamukhaani, waaxuttiha opatiiso wa Eroho Yowarya, olavula ilavulelo, ithoonyeryo ni mitikiniho waatthara alipa oowaamini, ni sikina; w'alipa amphwanyaneya, memmo.

<sup>33</sup> Miyo kinnaamini soovaha sothene s'erooho. Kinnimwaamini Bibilia othene. Miyo ka muPentekosite okhuma vasulu wa muru aka mpakha vathi va inawu saka, muhina, ota, mapuro

othene, ovira-mo. Miyo ka muPentekosite! Ayo, mulopwana! Eniriwa, “Nyuwo mwa ‘muPatista,’ moohimya.” Miyo ka muPatista muPentekosite. Miyo ka muPatista orina Eparakha ya Pentekosite. Vano miyo ka . . . Kinnimphenta Pwiya Yesu.

<sup>34</sup> Nto miyo kaamulaleya . . . Khwaaphwanya apatthani kamosa-kamosa a wArkansas, vate, ni hiyo naalavula mwaha w’Arkansas. Ni oLittle Rock, ohiyu umosa ntoko . . . Aahikhala munna muNasareeno mutokweene aarina attootto, ni aahitumiha ilaapi mphironi, iyaakha sinci-ene. Nto va owo aari ota muramphani, mmeeloni mwaya, n’attootto ale a khalayi, eettakasaka nno ni nno muramphani, anuwihaka Muluku paahi. Ohiy’ule aari . . . Autitooriyu wa Muupuxeryo wa Robinson, nyuwo atthu munikhuma oLittle Rock munnisuwela ti vaavi. Nto—nto owo khuyenxa ntata nawe, khwira, “Minuutu mmosa paahi, Munna Branham, kintthuna kookoheni etthu.”

Miyo khwira, “Ayo, mulopwana, exeeni iyo?”

<sup>35</sup> Nto owo khwira, “Moosuwela, okathi waawiiw’akani mulaleyaka, kaahikupali wira mwaari muNasareeno.” Okhala wira, ti yeeyo owo aary’awe. Owo khwira, “Kaahikupali wira mwaari muNasareeno, ’okhala wira munlaleerya siiso ntoko muNasareeno.” Ni khwira, “Vano khuwiiwani wira mwaaniira mpantta, okathi ule, wa ekereja Patista.” Ni khwira, “Muthukumano anyu wothene, ti Pentekosite, ohalela.” Khwira, “Nkinsuwelexa yeeyo.”

<sup>36</sup> Miyo khwira, “Ahe, ti yookhweya. Miyo ka muPentekosite muNasareeno muPatista.” Tivo ti siiso ekhanly’aya. Etthu yothene t’ila: hiyo nri mmosaru, mwa Kristu Yesu, ootthukiwa ni malutte a ophenta Wawe.

<sup>37</sup> Nrowe nivekele vano nihinatthi okhunla Masu, khanintthuna woopisihaxani vano wira mwiileliwe orowa okereja wanyu olelo ohiyu. Masi nrowe ninvekele Muluku vano wira arwe anireerihe, voowaattexa, vanci-enexa. Akavi arina yoovekela vano, nvenxe matata mwiire, “Pwiya Muluku, Nyuwo mukuupuwele paahi, ko—kookhalana yoothuna olelo”? Muluku akhale ni nyuwo.

<sup>38</sup> Tithi a Wirimu, naattamelaka-tho Mukhalelo Anyu Woowaarya, hiyo f- . . . nnari, ni, ninoona paahi ntoko orula ixapattho sahu, masi ninkumiha murim’ahu n’uhela ohoolo Wanyu, Tithi. Hiyo ninnooxukhuruni Nyuwo mwa sothene siniir’anyu ekampaanya ela yuulupale. Hiyo noosuwela, Pwiya, wira wunnuwa khonimya mammeru. Wunnuwa ti Mukhalelo Anyu. Maana, yaahilempwa mwaha wa Mesiya aarowa orwa, wira, “mapuro othene a musulu yaamwaataleliwa, ni mapuro oowaapattheya yaamukhalihwiwa osulu; mataakhuru yaamoopa ikuphi, ni miyaako saamutupha ntoko ipwittipwitthi sikhaani.” Ni mutthu aamuupuwela mwa wuupuwela w’ankhili awe, wa okathi uwo wuulupale waarowa okhala, wira ikaaro sa

mooro saamoorwa okhuma Wirimu, simuruuhaka Mesiya. Masi yiireiye sayi? Wa mulaleyi mutokweene ooneya ntoko a mutakhwani, akhumaka mothakoni w'oYuteya, hata ahiwanre ntoko murumeyi; ni nipattuuxa n'esapala aivitikelenle-ene, ntoko e—ekuwo; maihi mwa yoowo othene, ni ireru sawe wiitho wawe; alaleyaka, kahi mukereja, masi okerekhere wa Yordani, akhuwelelaka, “Murukunxe murima, maana Omwene wa Wirimu ori vakhiviru!” Ohitto mukerekhere wa muro wa marove, khurwa maravulo a Kalapinteero Mukalileya, eettale arowaka mmaasini, nto siiso Muluku khusuwela ni khuttittimiha mpakha Owo otthukula Erimu vano awo yaahoono Eroho Yowarya ekhuruwelaka ntoko epompa vasulu Vawe. Eyo yaari yuulupale. Ethhu mutthu oniihan'awe “yuulupale,” imaara sikina onkhala ololo vamaithoni Vanyu, Pwiya. Masi ethhu mutthu oniihan'awe “ololo,” enkhala yuulupale vamaithoni Vanyu.

<sup>39</sup> Vano hiyo ninnitteeliwa murima okhala wira ethhu yuulupale ehiiraneya oSan Jose. Va akilante arumeyi amphwanyaneya va, akina w'awo aniira mpantha a Asempeleya de Deus, akina aniira mpantha wa Ekereja ya Muluku, Yootaphuwa, ni aPentekosite Oowiiwanana, ni inamuna sothene soohiyana-hiyana. Nto va miyo kimphwanyaneya eiriyari aya, kihiraka mpantha wa hata mutthenkeso, masi ti weeserya weemela v'ephakani, kaalavulelaka othene. Ni hiyo nri mmosaru, mwa Nyuwo; murima mmosa, wiiwanana omosa, nipuro nimoso. Okathi xeeni wa Eroho Yowarya wuuluula ethhu! Munivahe, Pwiya. Nyuwo mukhale ni hiyo, Pwiya. Mureerihe khula muromolelo onthoonyeriwa vaava. Munivahe, Tithi. Arumeyi ala othene ooreera murima, ikereja saya sinnuwe ni sikelele ohoolo, Pwiya. Aretta evonihawe, oohoono yoone, oohiiwa yiiwe, anatampi yoopoliwe ni esarihiwe Eroho Yowarya. Okhale muhakalaliho ommwarela elapo ela yothene nno, onrowa ottikinya Olimani wothene Onkela nsuwa. Munivahe, Pwiya. Okhale wiivahererya onkawanyeya eriyari y'axinn'aka, vahikhanly'aya omumulaka; mmosa onoomuhakalaliha mukina, ni khula ekereja enookelela ohoolo ntoko omosa wuulupale, onkhalana opatthana mmosa ni mukhw'awe, ekawanaka yolya ethhoko ni ethhoko, ni ereerelo ya murima. Munivahe, Pwiya. Muveleelihe muhakalaliho ninlipelel'ahu.

<sup>40</sup> Mureerihe muthukumano, okathi awo anlipelel'aya oxekuw'ola ovonihawe waya, ni anci-ene woopoliwa waya. Ni mukikhaliherye, O Muluku, okathi onsom'aka mwa Masu Anyu ooreerihawe. Eroho Yowarya ekuxe ele ekhanle Yawinyu, Pwiya, eruuhe mmurimani mwahu. Vano nto mukirumeele, Pwiya, wira kivahe epantte yooosiveliha ya Masu Anyu wa khula murima ovoliwe etala. Mukiiwe, kinvekela, Tithi, mwa Nsina na Yesu kinnivekela. Amen.

<sup>41</sup> Ookhala onammalaru okivaha elepelo yaamukhaani, iirale, “Munna Baxter, a oCanada, onniveleeliha mphento awe ni



makhomaso wa nyuwo, ni owo ori wenco oCalifornia vano, okhalanaka muthukumano oConcord.” Muluku amureerihe Munn’ihu Baxter. George Patterson, muri vaava? George Patterson, muri vaava vamuthukumanoni? Mwakhala vale, mukuxe mphento aka . . . Muluku ooreeriheni, Munna Patterson; mukuxe mphento aka mmuroihele Munna Baxter, mulopwana mmosa ooreera murima. Ni akhala mutthu ti mutthu a nyuwo onkhala weiwo, mwatthuna wiiwa mutthaka woolaleeriwa ni mutthu onsuwela moota wo wira, murowe mwamwiiwe yoowo, mwakhala weiwo; vekeekhai owo mulaleyi mmosa muulupale. Naari vamosa iyaakha, iyaakha sene. Mphento aka khonamaleke wa Munna Baxter; khonkhalakhala omalaka. Owo ookhalana ekereja yuulupale oCanada. Owo khaawerya-tho okhala ni miyo, mwaha w’ophaveliwa okereja wawe.

<sup>42</sup> Koosuwela exeeni iyo. Hata Etapernakulu aka olelo, ya mwaalaano aka . . . Vano, atthu anveleeliherya soovaha mwaalaano yoola, aakhalana nummaru na kuveerunu nintthikela woolikarelani, wira muhilivihewe mpoosito wa sothene muniveleelihery’anyu mwaalaan’ola. Ola mwa—mwaalaano ohiniphwanya muruweryo, oniihaniwa Branham Tabernacle. Ni koosuwela, weiwo, maatinistaratoore ale annikikhanyererya, “Nrowe niteke etapernakulu yuulupale, nyuwo mukhaleke vaava mwaahiye atthu erwe wa nyuwo.” Eyo enniweya saana, masi kuhiyo otthuna wa Muluku wa miyo. Aakhala atthu kamosa-kamosa ahirina musurukhu woophiyerya wira erweeke wa miyo, kihaana orowa wa yaawo. Munnona? Tivo miyo—miyo kinnisuwela ele ekhanle okhanyereriwa.

<sup>43</sup> Ni Munna Baxter aahikhanyereriwa, vano owo aahaana ohiya ekempaanya khurora okereja wawe. Apwiya emureerihe Munn’ihu Baxter. Mmuroihele mphento aka ni makhomaso, mmansaka, a miyo, xontte, munna.

<sup>44</sup> Vano nrowe nikhunle mwa Soolempwa, wa minuutu soophiyaka miloko miili sinttharelana, Masu vakhani, yaawo, ahinkhalakhala evonyaka. Ni atthu othene ari va, aretta, amphavela etthu, mwiikelihe mMasuni paahi. Miyo kaarowa olaleya oxekuw’ola mwaha wa Moota *Xawawe Onttikinyawe Epuru Awe*, masi, khusuwela wira, amiravo aaphwanyasa yeeyo vaava khwaatumiherya atthu, ntoko eliivuru. Vano nto, kikhanly’aka oowalakakha vakhani vammilo vaka, kikunxe yoosoma ekina. Ni kinoona wira vano koohimya sothene saatthuneya wira kihimye. Vaareera. Nrowe nikhunle mwa Yohani, Yohani Oowaarya, kapiitulu 14, wa osoma wahu wa Yoolempwa. Nto nwiriyane oratteene okathi onsom’ahu iversiikulu thanu na tthaaruu soopacerya sa Yohani 14.

*Muhiriipiwe murima: mmwaamini Muluku,  
mukaamini miyo-tho.*

*Owannyaya Atithi aka khareere-wo mapuro ookhala: vahaakhanle siiso, kaamoohimeeryani. Miyo kinoorowa olokiha nipuro nanyu.*

*Vano miyo karowa ni khoodokiheryani nipuro, kinimoorwa-tho, ni kinimookuxani; wira vaavo miyo kinrow'aka okhala, ni nyuwo-tho mwakhale vaavo.*

*. . .weiwo onrow'aka nyuwo moosuwela, ni ephiro-ene nyuwo moosuwela.*

*Tome aahiira, Pwiya, khaninsuwela onrow'anyu; niwerye sayi osuwela ephiro-ene?*

*Yesu aahimuhimeerya wira, Miyo k'ephiro, ekeekhayi, n'ekumi: khaavo onrwa w'Atithi, ahivinre mwa miyo.*

*Nyuwo mwaakisuwenle, mwamwaasuwela-tho Atithi aka: vano-tho okhuma okathi yoola mookisuwela miyo, ni mookoona miyo.*

*Filipe aahimwiirela, Pwiya, nooniheryenei Atithi, nto vaavo vanoophiyerya; mwa moolumo makina, vanoosisivela.*

<sup>45</sup> Vano ti yeeyo entthun'aka olavula, oxekuw'ola. Onnikhalaka wunla wa murima wa mutthu, mwaha w'e...okhuma okathi okhanly'ahu atthu, naanithuna omoona Muluku. Ni kintthuna kikuxe inamuna soophiyaka xexe, oxekuw'ola, wira kiwooniheryeni Muluku. Yoopacerya kintthuna omukuxa Muluku mwa etuniya Awe, Muluku mwa Masu Awe, Muluku mwa Mwan'Awe, Muluku mwa atthu Awe. Ni naamuwerya okuxa inamuna sikina sinci-ene. Masi kaatthuna kilavule myaha seiyo mixexe, inamuna xexe soovirikana sinrow'ahu oweha, wira noone sinto ninoowerya omoona Muluku. Vano, kuuvo mutthu va yaahaarowa omusivela omoona Yoowo. Khiwaarowa woosivelani omoona Muluku? Miyo kaanithuna omoona. Vano vakhala wira Owo Mulukuu, yeeyo esuwenly'ahu wira ti Yoowo, vano exeeni hiyo ohiweryaka omoona?

<sup>46</sup> Yobi emaara emosa aahihimya yeeyo, Eliivuru ya khalayixa mBibiliani, aahihimya etthu sa, "Vaakhanle wira kaanisuwela paahi vatthu Owo onkhal'awe, kaamuruwa kamane mukhor'Awe. Ni kaanithuna olavula ni Yoowo." Ni owo aahaana olavula ni Muluku. Muluku khumwiirela wira aiththokihe saana ntoko mulopwana, maana Owo aarowa olavula-no. Vano Owo aahikhuruwa muhina mw'eyuupuru, khulavula ni Yobi.

<sup>47</sup> Enikuupuxerya e...iwe waattamela owannyihu. Hiyo ninkhala oMuro Ohio. Nto aahikhala mwanamwane mmosa mulopwana aarowaka Exikola ya Ttiminku, Exikola ya Ttiminku Patista, ekuluttu ahu, ni owo khaareere ohakalala. Nihiku nimos aakohaly'awe ame awe, "Sinto Mutth'ula muulupale onihaniwa Muluku, hiyo onrow'ahu okereja omukokhorela, vakhala wira Owo Mutthu muulupale,

kaanithhuna osuwela sinto mwaamuwerya okihiya kimoone Yoowo? Kaanithhuna omoona Yoowo.”

48 “Oh,” amai khimuhimeerya mwammiravo aya, awo khwira, “ahe, mwan’aka, muhaana omukoha prusoore anyu a Exikola ya Ttiminku, amai khanwerya waakhula etthu iyo.”

49 Vano Oxikola ya Ttiminku owo khulavula n’apurusoore awe, vano awo khwira, “Nkinwerya waakhula eyo, hata miyo, tivo vanreerela mmukohe pastore.”

50 Vano nuumala olaleerya, awo khimukoha pastore. Nto pastore khwira, “Nnari, mwan’aka.” Khwira, “Khaavo onwerya omoona Muluku.” Khwira, “Muluku ori ntoko etheku, ni khivanweryaneyya omoona.” Ni, vekeekhai, eyo khiyaamusivenlinhe mwammirav’owo.

51 Nto owo aari mpatthani a mulopwana mmosa mutokweene ohitto oMuro Ohio. Ni owo aari mulipa-oomiserya oosuwanyeya, ireru sawe soottweelela, ni orina iyaakha soophiyaka, miloko mithanu na mosa ni thanu, miloko mithanu na miili, athukumanyaka, akhalaka mukalawani yaamukhaani. Ni miyo koomiserya ni yoowo, yoomi, nto naanirowaka mukisironi n’umiserya, n’uhela iliinya s’olutta. Vano mwammirav’ola aari ni yoowo nihiku nimosa, omuro. Vano mphironi atthikaka, khuruma etarupa vano awo yaahaana waakuvela naanaanoru mukerekhere, wira yarinkhe ekalawa yaamukhaani, okhala wira mawimpi yaari maalupalexu ni otekuma wootteela, mpakha yaapittul’aya ekalawa-ene. Vano nuumala ovira etarupa, awo khukhumasa wiithela wa miri, khupurula ekalawa eyo yaamukhaani mukerekhere, khukhuma ettharaka muro, yoowo waari woophiyaka ekilomo emosa ni nuusu waavira oMuro Ohio iwe. Khunarowa ekhuruwelaka muro, yeettaka mukalawani, mulipa-oomiserya mutokweene avuraka iphontto.

52 Nto okathi yaaris’aya wiithela wa mwiri, mulipa-oomiserya mutokweene aahimutharihela mwammiravo ehantisi (ntoko saamukohaly’awe) mwaha wa zeeni ahaathelenly’awe, ni ahaarin’awe hata mutthu wira amukhapeleleke. Nto owo khwira, “Oh, mwan’aka, ookhala Mutthu onikikhapelela. Nto etthu ehithelenly’aka, amwaar’aka ari Wirimu, ekilipelelaka.” Vano khukelela ohoolo atharihaka ehantisi ene.

53 Vano vakhumaly’awe mmuro, awo yaarowasa onkhuma nsuwa ni ekalawa yaamukhaani... ahiiso yaarowasa onkela nsuwa, kiireke, ni ekalawa yaamukhaani, vano mulipa-oomiserya mutokweene awehaka... ottuli wa muro epantte onkela nsuwa, waari oxekuwa, ni—ni nsuwa naamutupweela. Nto, nuumaaxa epula, yaahikhuma ekhweyi.

54 Nto, oh, kinoona wira owo okathi wootepe oreera! Okathi epula eniir’aya erapihale-ene makhurumela othene mmirini, ni—ni sinkhala sooreera saana, sikithi, ni makhuli aya eephattu. Ni ithutu sothene sinkhala sooreera ni mukhalelo w’elapo ory’ene

woomaaleleya, onruuha wunkhela wa ethutu. Onkhala okathi wooreera pahi, nuumaaxa epula.

<sup>55</sup> Kinoona wira mwa enamuna emosa eyo enikuupuxerya, nuumala muhakalaliho, Eroho Yowarya ekenle-ene khurapiha ntthupi nothene, khu—khunikhalih—tho owiisumaaliha ohoolo w'Apwiya. Wira nikhale paahi Ohoolo wa...ntoko siry'aka oxekuw'ola, orapa va paahi Ohoolo w'Apwiya Yesu. Eroho Yowarya ekumihaka ohoverya wothene ni woova n'itthu mwa hiyo, n'ukhala vamosa, nuumala o—nuumala epula enkhuma Wirimu osariha minepa sahu.

<sup>56</sup> Okathi mulipa-oomiserya mutokweene opaceny'awe opurula ekalaw'awe, mwammiravo aahoon maithori opacerya omora wiitho wa mulipa-oomiserya mutokweene. Vano mwammiravo khurukunuwa wira oone etthu owo aaweh'awe, nto yaahikhala ekhweyi osulu. Vano mwaapar'owo mwaamukhaani akilanthé-ene epantte y'ottuli wa ekalawa, khutikinihiwa. Vano owo aavarenle epantte ya ntthanka, vano khuyenya, khutthimakela epantte y'ottuli wa ekalawa khuphiteerya ottuli wa mulipa-oomiserya mutokweene. Nto owo khwira, “Kintthuna kookoheni etthu emosa ame aka nakhala apurusore aka a Exikola ya Ttiminku, wala pastore, ahinwery'aya okaakhula.”

<sup>57</sup> Vano mulipa-oomiserya mutokweene khumaaliha weettiha ekalawa, nto khwira, “Exeeni iyo, mmiravo?”

<sup>58</sup> Owo khwira, “Kirooweha wira munweha ekhweyi ile.” Khwira, “Kinileeliwa wira Muluku t'ohenle osulu iwe.”

Owo khwira, “Eyo ekeekhaii, mmiravo aka.”

Owo kwira, “Vakhala wira Muluku muulupalex, aamuwerya mutthu omoona Yoowo?”

<sup>59</sup> Nto mulipa-oomiserya mutokweene khumpatikha mwammiravo vatthirima vawe, nto owo khwira, “Iparakha sikhale mwa nyuwo, mwammiravo aka! Mukihiye kooleleni etthu. Sothene koonaly'aka mwa iyaakha miloko mithanu sivinre onkhalaka Muluku.”

<sup>60</sup> Khaareere Muluku muhina, mpakha vaawery'awe omoona Yoowo ota. Vano, eyo ti enamuna emosa paahi munrow'anyu okhalakhala mmoonaka Muluku, onkhala omuhela Owo muhina mwa nyuwo, omuhiya Owo oweha ni maitho anyu, vano Owo onimwiisooniherya Mwaneene.

<sup>61</sup> Vekeekhai, Muluku ori mutuniyani mw'Awe. Khaavo mutthu orina muupuwelo awe wooloka aakhanle wuupuwelaka... Murowe nno oLos Angeles, Mwaako Palomar, nipuro nlo, nto nwehe yoowo, ilarataro iye sinkumihiwa. Ni nweheryo ole muulupale, vaavo aanuxi-luxi iye emilyawu emiya ni imilyawu miloko miili s'ephaka ya waarya, munoowerya woona. Mpwexakase yeeyo mpakha ikilomo, moone vatthu

mwaarow'anyu orowa. Vano, nyuwo mwaamutthyawa irukureryo thanu na xexe epoom'ela yothene, nlelo khimwaawerya opwexakasa mpakha ikilomo. Masi ovikana eyo yookhala-wo inamuna yo weetta sa nsuwa, ohoolo waya! Nto okathi mutthu onweh'awe yeeyo, eri etthu emosa paahi mukhanly'anyu wira, ovenxa matat'anyu ni, "Sayi," wiipa, "Muulupale Ti Nyuwo! Muulupale Ti Nyuwo!" Khula emosa erukunuwaka oratteene, mpakha vanweryaney'aya oleeliwa ovaruwa wa nsuwa ni wa mweeri, iyaakha miloko miili ehinatthi okhumelela, minuutu ene. Yookhalihwiwa okathi aya oratteene ni Muluku!

62 Vano nto mwaweha vale paahi mwa ephattu, moota Muluku onrow'awe weetta eriyari y'etuniya Awe. Moota olumwenku othetemanihiw'aya vakhani paahi, wira oruuheke ettheke yooviha ni yooriirya vamosa, wira opakeke epula ennaaniha soolima sanyu. Moota Muluku onkhal'awe mutuniyani mw'Awe! Munnaamini yeeyo? Vekeekhai, Owo onniira.

63 Nto okathi vakhani ovinre kaalavula ni mutthu mmosa, mwaha wa Muluku. Nto waari ohitto, oKentucky. Nto owo khukiirela. . . Owo aari mutthu oohaamini. Mwenye Wood ni miyo naaxaya mireyi, vano hiyo khurwa onvekela sinto vaamuweryaneya oxaya opuwani wawe. Nto owo khwira, "Oh, rowakani," owo khwira.

64 Munna Wood khwira, "Ti miyo ni awaka—pastore aka, nintthuna oxaya."

65 Owokhwira, "Wood, khamunihimya wira murookhalexa vathi mpakha murin'anyu omukuxa mulaleyi okhala ni nyuwo okathi wothene?"

66 Nto owo khwira, "Nnari, ola pastore aka paahi." Khwira, "Omusivela oxaya." Nto khwira miyo. . .

67 Nto miyo kaahikhala kitenke-ene eheema isumana soophiyaka piili, ni ireru soorekama ntoko isentiimeturu emosa ni vakhani; ni—ni ooriipa ntoko saaweryaney'aya okhala, mwaha w'orupa vathi, moota waatek'ahu iheema. Miyo kaari vate, kimumulaka. Nto eyo ti enamun'aka y'omumula, okhala wira kimmuphwanya Muluku mwa soopattuxa. Owo t'ari Bibilia aka oopacerya, aari Muluku mwa soopattuxa Sawe, mutuniyani mw'Awe.

68 Nto owo khwira, "Ahe," owo khwira, "kinoona wira ti vooreera, opatthana n'alaleyi." Owo khwira, "Masi, moosuwela, kookhalana muupuwelo aka wa itthu iyo." Owo khwira, "Miyo nkinaamini hata muthinto mmosa w'etiini." Ni aahikhala mulopwana mukina aakilante ni yoowo. Nto—nto hiyo khukelela ohoolo, nilavulaka mwaha w'etiini (awo yaahilavula) okathi vakhani. Vano miyo khweemela vale paahi, kikhuuraka masa kaattonte aka vathi.

69 Nto owo, mulopwan'ola mutokweene aari oohaamini, owo khwira, "Miyo imaara sinci-ene kaaniikoha. Kaanitthuna okumana ni mulaleyi." Ni khwira, "Owo t'ule aari wenco oActon, okathi ule." Owo khwira, "Moosuwela, munna mmosa muthiyana mutokweene omwaako nno; nkinwerya wuupuwela nsina nawe vano." Khwira, "Mulopwan'ole eemenle weiwe Vaatekiwe iheema n'aMetotista," waakhaliheriwe ni ekereja Metotista. Ti yootikiniha, masi yaahiraneya. Ni hiyo naarina ekampaanya y'ovoniha.

70 Vano, nyuwo aMetotista mwaahaana waamini iyo. John Wesley aanaaminiki. Vekeekhai, owo aanaaminiki. Anamareherya othene oopacerya yaanaamini ovoniha wa Muluku.

71 "Nto," owo khwira, "eemenle-ene vamuthukumanoni ohiy'ule, aahilavula ni muhim'awe muthiyana'ola mutokweene nno. Wira amwaar'aka ni miyo n'aiy'awe, sothene saawery'ahu wira (owo aahimalamala mwaha wa kankuru, mameetiku yaahimuhiya, isumana saavinre), ni omuhela v'epuruloni voosiis'ule." Khwira, "Owo aarina mukhalelo mmosa!" Nto khwira, "Muhim'awe khurwa muthukumano yoole. Ni wira mulaleyi ula khwiihana nsina na muthiyana'ola, khumwiiwela wira arwe, 'ampweherye nleeso muthiyana'ola aarina kankuru,' munn'awe. Nto owo khwira, ohiy'ule. Nto voosiisu aya, owo khukhuura enama ni mooce, ni aahaapeya esereexa ya masa oowaarikiwa wira alye voosiisu, khulyaka." Owo khwira, "Kintthuna kikumane ni mulaleyi yoole nihiku nimosa." Miyo khweemela vale paahi.

Nto miyo khwira, "Mwaanimusuwela mulaleyi ene?"

72 Owo khwira, "Nnari, nkimmusuwela." Nto Munna Wood khukiweha, khwaaphila.

73 Nto miyo khwira, "Muntthuna okileela wira khamunaamini wira ookhala Muluku?"

Owo khwira, "Nkaakhanle waaminiki vahikhanle wira kaamuwerya wona."

Miyo khwira, "Mwiri ule wa masa orina iyaakha kavi?"

"Oh," owo khwira, "Miyo kiphatteye vale iyaakha soophiyaka miloko mixexe khalayi."

74 Miyo khwira, "Wopaceryani wa Setembro paahi, khinaarina okathi woorirya wala etthu. Mukileele, mulopwana, exeeni iyo enlavula, Osuwela xeeni onihimeerya mwiri ule n'ukhuruweliha ephwamwaas'ile vathi mmitathaarini ni wiipithela eyiita? Muyeeherye maasi v'exaani moone sinto enimwiira, wala muhasa muulupale vaavo, moone sinto enoorowa vathi yiisiipitihe vathi, etthyawaka okathi woorirya. Yahiire siiso, okathi woorirya waamwiwa mwiri naanaanoru. Masi wookhala Osuwela onthyawiherya ephwamwaasi muhina vathi, okhuma

mwiri ule, n'ukhaliha yooviha; okhuma mmataakhuruni, amorenle vathi, okhuma mmwirini. Nto ephovo enttharelana, okathi ene hata ohinatthi opacerya olokiheya, va enoorwa ephwamwaasi etthikelaka osulu, eruuhaka ekumi esya. Mukileeliherye yeeyo. Mukileele etthu eniira siiso."

Owo khwira, "Nkinatoko wuupuwela yeeyo khalayi."

<sup>75</sup> Miyo khwira, "Ti Muluku mutuniyani mw'Awe. Muluku onikhaliha okathi aya itthu sothene oratteene."

Owo khwira, "Nsina nanyu mw'ani?"

Miyo khwira, "Miyo ka Munna Branham."

<sup>76</sup> Owo khwira, "Owo ti mulopwana, nsina—nsina na mulopwana aari iwe."

Miyo khwira, "Ti yeeyo."

<sup>77</sup> Owo khwira, "Ni ipwetupwetu iye sothene, ni oosareya ephome ya mireyi, nyuwo?"

Miyo khwira, "Ti siiso pahi, miyo, miyo ka mutthu ene."

Owo khwira, "Mwaamusuwenle sayi muthiyan'ole?"

Miyo khwira, "Nkaamusuwela."

<sup>78</sup> "Mwaasuwela sayi wira aamurowa okhala mukumi?" Khwira, "Owo onoomalaru ovira ephiro va, owo n'aiy'awe, okathi vakhani ovinre, eettaka."

Miyo khwira, "Miyo nkaasuwela eyo."

Khwira, "Muroomuvoniha?"

<sup>79</sup> Miyo khwira, "Nnari, mulopwana. Muluku t'onihenrye, Muluku t'omuvonin'he, awo mahal'Awe ooreerexa!"

<sup>80</sup> Owo aakhuura masa, vano khukwenya. Vano owo khurukunxa muru awe, khwira, "Mukeleleke ohoolo ni muxayeke mireyi."

<sup>81</sup> Miyo khuwehaweha, vano maithori yammora wiitho wawe. Miyo khumpweherya moonoo aka, miyo khwira, "Munna, munnimwaamini Yoowo, kahi siiso?" Khuuramiha muru awe *saale*, khurukunuwa khurova veehilini. Oh, Muluku ori mutuniyani mw'Awe!

<sup>82</sup> Okathi vakhani ovinre, mutthu mmosa oohaamini aaroovira mulaponi, iyaakha sivinre, iyaakha miloko mixexe, miloko mithanu, miloko mithanu na mosa sivinre, aarukunxaka murima athu. Oh, owo aari oosuwelexa ni miyuupuwelo sawe s'ankhili mpakha alaley a vano, olavula v'ankhili, vahaawery'aya okhalana etthu vakhiviru ni yoowo. Vano oorukunxa murima owo khwaakhaliha m'ohaaminini. Nto emaara emosa ekumi awe khumora; owo khurova oColorado, waattamela exavo emosa weiwo kaasukihaaka inama ni ovara muteko. Nto owo aamwiithyuuwa ottuli iwe. Mulopwan'owo kaamusuwel'aka, ni atithi awe, yaaroothikilasa e—ephiro, wira ekhalihe omaka waya

n'ehema. Nto nihiku nimosa owo aamukhuma ahokolowaka, nto owo khweemela. Vano khuweha myala, nto khwira, "Mukhumme vayi vekeekhai? Muphiyale sayi iwo?" Vano itthe ku khupacerya oruma. Owo khwira, "Kinoovonya okathi wothene? Vakhala wira ookhala Muluku, mmuhiye Owo alavule ni miyo!"

<sup>83</sup> Vale, mutakhali murima owo alaleyi wala hata mutthu ahaawerya—ahaawerya ommaaliha ahiiso onvirikanya, kiireke, mwa moolumo a osuwela wawe, masi awo yaanimoova. Masi Bibilia oohimya, "Awo yamaalaru, maluku t'anrowa okhuwelaka." Muluku ookhalana enamuna yo wira itthu. Maluku yaahikhuwela! Vale okokhonre-ene, wiitho wawe opopheenle-ene vathi, owo khuvahererya erooho awe yootakhala wa Muluku, khukhala owiisumaaliha, muKristu oowiiyeviha. "Awo emaale, soopattuxiwa sinookhuwela."

<sup>84</sup> Miyo, miyo ka mulipa-ooxaya. Miyo—miyo okisivela oxaya, okhala wira ti memmo kaamuphwanyaaka Muluku, toko, waari mutakhwani. Okathi waapacenry'aka otthuna omurumeela Yoowo, nkaasuwela moota wo olompa. Ni hiyo khanaatonko orowa okereja; atthu ahu, ottuli, yaari . . . miyo, yaari aKatolika. Awo khaya . . . aIrlanta, oyariwa wene, amai n'atiithi, oowanli; waahiya, apwaapu yaari muHinti. Vano nto awo . . . nkaasuwela moota wo olompa. Ni kaanithuna woopowa, nto, moosuwela etthu kiiraly'aka toko? Kaarookilaathi khimulepela epaphelo Muluku, khimuleela wira kaahiiniwa murima mwaha w'etthu kiiraly'aka. Nto kaarowa okhuma kirowe mutakhwani, ephiro emosa vaavo kahaareery'aka woona otikinihiwa okathi waavir'aka mapuro ala, ni kaarowa okhomela vamwirini wira Owo awerye osoma okathi waavir'awe vaavo. Okhala wira, kaanisuwela wira Owo aakhala weiwe mutakhwani nipuro nlo. Kaarimoono itthu sinci-ene okhumelela; kaanisuwela wira Owo aakhala nipuro nlo. Nto miyo kuupuwela, "Owo, ory'ene oohikhalana etampi, Owo aamukhala nipuro nimosa naari nooloka, ni vahaakhal'aya atthu." Owo aaniwerya . . . Miyo kaaniwerya omuphwanya memme oratteene ovikana waakhanly'aka omuphwanyaka ntoko eriyari ya mapuro atthu yaananarihaly'aya. Kaahixutta, Bibilia aka oopacerya aari soopattuxiwa.

<sup>85</sup> Wala, nyuwo—nyuwo mukuxe marattha ala makhaani. Awo ankhuma Okuusini nno, n'urowa, mpakha oCanada, ni ampaka ipuru saya weiwe mmaroveni. Nto anoorela mooce aya, vano marattha maxikhaani anooyariwa. Vano, nto, eyo enkhala okathi w'ephovo. Mwaakha yoowo, awo anoovenya, elimwe yothene anoolyihiwa. Nto okathi eyiita enr'aya, emaara yoopacerya orwa etthe ku yooriirya erumaka mmiyaakoni, memmo etthapwe enkhala'aya, enooruma eviraka mminyepuni memmo ari matthiya, wala miyaako sa mukhitte, nto etthe ku ile yaamukhaani yooriirya yoopacerya enooruma vaavale, ni nakhutu memmo; nipuro nimosa muhina mwa nikoto nle



nuulupale na marattha vantthiyani va, ookhala muhooleli mmosa mwaamukhaani, nrattha noolopwana naamukhaani. Nlo ninootthya wa vale eriyari ya ntthiya nle, nookolele osulu munupi ule mwaamukhaani, ni wiipa imaara xexe wala thanu, khula nrattha vantthiyani nnimoorwa wa yoowo. Owo onoovenya vale. Owo khankhalakhala akhumaka vantthiyani vale; oyariwe vaavale okathi ule w'ephovo. Nlo ninoovenya vantthiyani vale khurowa mpakha oLouisiana ntoko ninwery'aya orowa, mpakha imatta iye sa musoro; hata epuusula nnakhala. Enihaniwa "esimu."

<sup>86</sup> Miyo imaara sinci-ene kinnuupuwelaka, vakhala wira Muluku oomuvaha otthokelela woophiyerya nrattha, onihaniwa "esimu," wira emukumiheke mmukattiyamihoni, exeeni Owo okhanly'awe wiirihaka ekereja eyariwe vasya, yoosareya Eroho Yowarya? Exeeni Owo okhanly'awe wiiraka? Nlo khanrina epuusula, masi niyariwe muhooleli! Marattha annimusuwela muhooleli aya, masi ekereja khemmusuwela. Eroho Yowarya ti Muhooleli ahu, Eyo ti Muxuttiha ahu, Eyo enoonihoolela mw'Ekeekhai, mw'Ekumini. Marattha annimusuwela awaya, masi enkhala ntoko imaara sikina hiyo khanrina ankhili saana ntoko nrattha. Okhala wira, owo omusivela okhala ni yeele evahiw'awe, masi hiyo nineererya osuwelexa etthu ekina yoovirikana. Awo t'ankhili, munookhuma mutuniyani yuulupale ya Muluku.

<sup>87</sup> Kinimooleelani etthu mukhanly'anyu wira, atthu kamosa-kamosa a nyuwo munikhuma ilapo sooriirya. Munooweha ekuluwe ele yoothiyana orowa okhuma epantte enkela epheyo ya mwaako, n'uruuha makatamphe ale othene mikopoothi epantte y'okuusini ya mwaako, n'upaka olili aya. Nto ohiy'ule munimwiiwa ihapari, nto ihapari sinrowa wira, "Meelo, onookhala okathi wooreera," muhixikhe hata vakhani etthu onihim'y'awe. Ekuluw'ele yoothiyana ennisuwela saana s'okathi ovikana awo anrow'aya okhalakhala esuwelaka. Eyo vekeekhai ekhweelii. Eyo eronwe epantte y'okuusini weiwo onrowa okhala wooviha.

<sup>88</sup> Nyuwo mwarowa waaxaya ahukula munoowoona ahukula awo ekilanthene-ene vathi va nvelo, ntoko sa, ewiriyanelaka okathi wooriirya! Nto mwawoonaru okela mmatta mwa nakhuwo, ehanle orupa epula.

<sup>89</sup> Munwehe Muluku paahi, Owo onneetta, oh, moota Owo ory'awe oothamaleya! Mwatthukularu maitho anyu paahi, munoowerya omoona Owo vakhiviru ni nyuwo. Owo ori mutuniyani mw'Awe, mapuro othene, eetteetaka. Mmuwehe Owo mwa otupweela wa nsuwa. Mmuwehe Owo mwa ophattuwa wa nsuwa. Mmuwehe Owo muhina mwa ekhweyi. Mmuwehe Owo mapuro othene. Munoomoona, Owo khokhanle ottaiwene wa nyuwo ovikana moonoo anyu woolopwana. Muluku ori mutuniyani mw'Awe.

<sup>90</sup> Iyaakha vakhani sivinre, kaaxaya itthove, oColorado weiwo onxa'ayaaka-wo imaara kamosa-kamosa. Nto mmyaakoni mme, waari woopaceryani w'ephovo, nto etthapwe khiyaatepanxe voophiyerya woomola etthove mmirini soorekama, oroiha mukhatoni. Vano Jeff ni miyo, mulipa-oosukiha, hiyo naahikhhalana...miyo kinnimukhaliheryaka osukiha inama memme iyaakha sinci-ene, ni nlelo kinaakhaliherya othukumanya inama. Nto hiyo naahirowa, wira naxaye, nto owo aahaana orowa okihiya mahiku mararu wala maxexe. Owo aahitthikela onkawanyeya muro epantte onkela nsuwa wa Muro Troublesome, nto miyo kaaxaya moonoo w'epantte onkhuma nsuwa. Vano hiyo naphwanya etthove, naamuhiya, ni osuwela vatthu v'oruuha ikhavaloo sookuxa, nto naakhala vakhukuluni va ikhavaloo sahu.

<sup>91</sup> Nto nihiku nimosa miyo kaari osulu, khukhuma vakhukuluni v'ekhavaloo aka, nto khunarowa kittharaka ekerekhere. Vano opisa weiwe okathi w'ephovo, eyo eno, naanaanoru, nsuwa nnimwaarya, nto enoorupa epula, nuumala onookhala wookukuttheya, nuumala enookhala etthapwe. Vano, owo okathi onrukunuwa paahi. Nto miyo kaamuxaya, osulu. Waahuuma saana, vano miyo khwiiwa oruma w'overunya; vano miyo khuweha, erwaaka mmyaakoni, epula yaamoora. Vano, miyo khukela wiithela wa mwiri khweemela weiwo okathi vakhani mpakha etarupa ovira. Ittheku saamuruma n'urukunuwa, erukureryaka, vano miyo khweemela wiithela wa miri mpakha omala. Vamanly'aya . . .

<sup>92</sup> Miyo kaahikhala keemenel-ene vaavo, kimuupuwelaka Muluku. Sivinre iyaakha vakhani paahi, kaakhhalana ikampaanya seiya. Nto miyo khuupuwela, "Moota Muluku ory'awe muulupalex, ni moota ory'awe oothamaleya!" Miyo khwira, "Kihaana wira kiyariwe-ene mwaha wa nipuro nenla, mutakhwani, meekh'aka mmansaka, ottaiwene w'atthu ni mittitthi, n'aretta ni ooxanka, ni itthu sothene, atelefooni arumaka, ampulansiya erwaaka." Miyo khuupuwela, "Moota ory'aya woomaaleleya ni wa murettele! Pwiya, mukihye kikhale wenno. Nto miyo—miyo kiyareliwe yeela, ola ti mukhalelo aka, wenno t'oniir'aka mpantta. Wenno ti otthu Nyuwo onkhal'anyu." Nto miyo khuupuwela, "Ahe, kaahikhhalana mwa yeela, kinookhalana oMileeniyu, tivo kinoolipelela okathi yoowo paahi."

<sup>93</sup> Nto okathi etarupa emanly'aya, miyo khukhuma wiithela wa mwiri. Nto, ottuli epantte ya mwaako, kaahiiwa etthove yoolopwana opacerya o-okhuwela. Vano eyo yiihana nikoto nikina; iyo saaroomwareya, okathi w'etarupa. Nto eyo khupacerya omwiihana mukhw'aya. Vano ntoko Davidi sihimaly'awe mwa Soolempwa, "Okathi yowiixerya eniihan'aya Yoowiixerya"! Yakhala yoowiixerya, eniihana, ehaana okhala Yoowiixerya wira yaakhule, nipuro nlo.

94 Vano nto ephattuwelo yeele khupacerya ovenya mwa miyo. “Nla ti nipuro na miyo okhala. Oh, eyo esipoo!” Ottuli nno, mwiici oottweelela khukhuluma, vano mpatthani awe khwaakhula, ohitto saana. Oh, wulu! Owo p’ukathi vekeekhai yoowiixerya eniihan’aya Yoowiixerya; wiiwa wiihana iwe wa mutakhwani wa mwiici, axinama kamosa-kamosa a mutakhwani enyakulaka axipalame yiipaka. Wa miyo, ti Muluku! Kinniwerya omwiiwa Owo eriyari ya maxeni Awe ni inama Sawe.

95 Ettheke erumaka, koonale oweha wene ottuli nno vaavo e...erumaka, oriirya woophiyerya wuumiha maasi mmirini soolekela. Nsuwa khukhuma, epantte onkela nsuwa, epant’ila, ni naakhala ntoko niitho niwehaka weiwe, ntoko Muluku, mwa otupweela wa nsuwa. Nto miyo khuweha wira naahikumiherya ekhweyi eviraka mukhatoni. Nto miyo khupacerya wuupuwela, “Owo ori vale muhina mw’ekhweyi. Owo ori iwe, mwa wiihana w’etthove. Owo ori vale mwa mwiici, iihanaka. Owo ori va mmirini. Kinniwerya wiiwa nsu Nawe noopaka muturi. Owo ori vale muhina mw’ekhweyi.”

96 Maana, “Owo aahaana oweha vasulu va nluku na Yasperi ni Sartooniya, ni ekhweyi vasulu va muru Awe; Alfa, Omeka, oopacerya ni ookiserya; Ole Aakhanle, Ole okhanle, ni Onrowa Orwa; Yoophuwa ni Osuulu wa Davidi.” Vano ni ekhweyi, makhuli mathanu ni manli, oreera voomalela. Muluku ommalelihiwa mwa thanu na piili. Ni Owo aari-tho vale ntoko ekhweyi, ntoko mwaataano.

97 Mapuro othene munweh’anyu, munoowerya omoona Muluku, mwamuweharu paahi mwa ephattu Awe. Nto okathi onkhalan’aka sothene soomaliheriwa...Kinrowa wooleelani etthu, vano munoosuwela wira ka—ka muPatista eekeekhai. Okathi waaweh’aka yeeyo, kaahisareya Eroho Yowarya mpakha omuphiteeriha mwiri kapwitthi aka otthyawa kirukureryaka mwiri kiilipihaka ntoko saawery’aka, kimanaka nnawu nimosa osulu, ni kinyakulaka voowituperya, kikhuwelaka, “Aleluya! Aleluya! Aleluya! Aleluya,” kirukureryaka, kirukureryaka, kirukureryaka, mpakha ohalela omora; nto khweemela khuttukhulela matat’aka osulu ni vathi, nto vale kikhuwelaka, “Ovuwa! Ovuwu! Ovuwu! Ovuwu! Ovuwu! Aleluya! Aleluya! Aleluya! Aleluya,” kiilipihaka ntoko saawery’aka otthyawa. Nkaawerya wuupuwela-tho hat’etthu yoohimya. Murim’aka waamutekhuma.

98 Yaari exeeni? Yoowiixerya yiihanaka Yoowiixerya! Kaahimwiiwa Muluku iwe mwa enamuna emosa khino nyuwo mwahaarow’anyu omwiiwa. Masi, wa miyo, Owo aari mutuniyani mw’Awe, aihanaka otthika, “Miyo ka Muluku a soopattuxiwa. Miyo kipanke itthu sothene ni ntata Naka Yoomi.”

<sup>99</sup> Ayo, mutthu arwa mutakhwani, yaamurowa wuupuweliwa wira aahikhala namukhwanepa mutakhwani. Kirukureryaka, kirukureryaka, kirukureryaka, kirukureryaka, kirukureryaka mwiri ule kaanirowa, kikhalanaka okathi woovuwa paahi! Nkaari. . . mutthu ti mutthu, nkaacala sinto kaaniwiwa, wala nnari. Kaari ikilomo miloko mithanu na miraru, ikilomo miloko mixexe ni thanu na tthaaru, khula enamuna, w'omurakamela mutthu ti mutthu, ntoko kaasuwel'aka. Masi kaanirukureya mwiri kirukureryaka, kinyakulaka.

<sup>100</sup> Mwaha wa zeeni? Kaari mukatetraale mwa Muluku. Kaaniwerya omoona Yoowo mapuro othene, nsuwa, mirayi siviraka mutakhwani, ekhweyi epantte ekina, mwiici akhulumaka, etthove yinlaka. Kaaniwerya omwiiwa muhina m'wetheku. Oh, wulu, Owo ori mapuro othene! Osulu iwe, vaaniweryaneya wona etthapwe v'ethokani va miyaako, ni ekhalihaka muuttutthi vathi mmirini. Oh, nwehe paahi khula nipuro, munoomoona. Owo ori mutiniyani mw'Awe. Munnaamini yeeyo? Miyo kaaheemela vaavale okathi vakhani.

<sup>101</sup> Nuuvira okathi vakhani kaahiiwa etthu yiiraka, "Catta, catta, catta, catta! Catta, catta, catta!"

Miyo khuupuwela, "Exeeni iyo?"

<sup>102</sup> Miyo khuwehawehe. Waahikhala oruma vale vaavo e—etarupa khalayi yaattikinyaly'aya miri kamosa-kamosa, ni waahikhala mureyi mwaamukhaani a mupinyeeroni. Nkisuwenle sinto munnisuwela exeeni seiyo, wala nnari. Akavi ansuwela ole okhanle mureyi wa mupinyeeroni? Owo mwaamukhaani mmosa oonyakulaxa okhanle mulaponi. Nto owo khutuphela exa emosa ya mwiri vale. Ni iira paahi ntoko wira aatthuna o. . . aarowa okikherasa kapatti-kapatti, paahi, "Cat, catta, catta, catta!" Owo aamutupha-tupha osulu ni vathi, attikinyaka mapuro othene, ilipihaka ntoko saawery'awe. Oh, owo aarowa okithikilasa.

<sup>103</sup> Ahe, miyo khuupuwela, "Mwaamukhaani, khivanthuneya okhala othene ootannyeyasa siiso. Khamunrowa wira etthu. Ni miyo, miyo ko, etthu, kirimootutuxani?" Miyo khuupuwela, "Ahe, khivaatthuneya otuthuwa mwahawa yeeyo. Miyo kaamuttotopela Muluku paahi onipattunxe hiyo oowanli." Munnona? "Khivanthuneya nyuwo othene osarasareya. Miyo kaamuttotopela Yoowo, tivo muhikhale othene ootannyeya siiso. Ahe, miyo kaamuttotopela Muluku paahi, mwaahaana osuwela saana ohiya okinyakula siiso. Muhikihaaxe kaakhuwelaka siiso, okhala wira kinviraha okathi wooreera. Mukihye." Munnona?

<sup>104</sup> Nto khwiiraneya onweha mwaamukhaani aamuvenxerya muru awe mwaamukhaani epantte emosa, n'uweha vathi va nvelo vale. Ahe, khuphiyerya osuwela wira owo khaakikhuwelela miyo. Vanveloni vale, erumaka etarupa,

aahikhala xawawe mmosa muulupale aamorenele vathi. Nto owo khunyaanyeya vaavo, khuvevelehiwa mwa oruma weiwe w'etthekeu. Nto mwaapar'ole muulupale, yaari mwaha wa yoowo mureyi wa mupinyeeroni ule wahaareery'aya otannyeya. Vano owo khutuphela erintta emosa.

<sup>105</sup> Miyo khuupuwela, "Vano, nwehererye minuutu mmosa va, yookhala etthu nipuro nlo. Okhala wira, miyo kaamukokhorela Muluku, kitthyawaka kirukureryaka kirukureryaka mwiri ula nno. Vano miyo khumoono Owo mwa itthu iya sothene soohiyana-hiyana sa Yoowo, ni ephattu ila. Vano, mwaha wa xeeni Owo aarow'awe okikhottihwa mwaha w'etthu ntoko ele?" Vano, aahikhala xawawe mmosa a khalayi. Miyo kinnimuxankela xawawe. Masi kaahimuweha, nto khuupuwela, "Ahe, xeeni. . . Kaamuwerya omoona Muluku mwa yoole? Vano yaarowa okhala exeeni iyo?"

<sup>106</sup> Miyo khimuweha. Maitho awe, maalupale oottweelela, ni eemenle vale varinttani yeele, akiwehaka. Vano owo khimuweha mureyi ula, vano nto khutthikela okiweha miyo; vano khuweha mureyi, nkawehani. Miyo khwira, "Kinoona wira munooniweha." Vano miyo khuupuwela, "Moosuwela? Kaamuwerya owoopelani, kaatthunneru." Vano miyo khimuweha. Vano kapwitthi aka aari vale ophitenrye-ene mwiri. Miyo khwira, "Mwaanisuwela wira kaamuwerya owoopelani kaatthunneru?" Khuhicala hata vakhani, okilantthe-ene vale paahi.

<sup>107</sup> Miyo khuupuwela, "Oh, ti yeele Muluku ontthun'awe wira koone, 'Muhoove.'" Xawawe ole t'owali, owo khanoova etthu. Khaarowa wuuliwa muru omuleela mukhulupale awe wira aahiyonihiwa ni ovoniha wa Muluku. Khenrowa omuhaaxa. Ole ti—ole t'a ikuru. Owo khaarowa woova ohimya onamoona sinto aahaakhela Eroho Yowarya. Vaakhanle wira yaari ya yoowo, vekeekhai aamurowa ohimya onamoona wa Yeeyo; 'okhala wira owo t'owali, khiivo yo wuuleliwa muru mwaha wa yoowo.

<sup>108</sup> "Ahe," miyo khuupuwela, "xeeni mukhalenly'anyu owali? Xeeni enookhalihani owali?" Khupacerya oweha nto, wira owo aanikhala onaka mapupha ale. Nyuwo moosuwela moota anttikiny'aya mapururu aya ottuli ni ohoolo, moosuwela, opurula mapupha aya. Miyo khuupuwela, "Oh, kinnoona. Uh-huh. Muluku oovan'heni mapupha maili. Ni moosuwela saana ni oratteene wira mwaamuwerya okuxa mapupha awo maili khukela mmwirini mme kihinatthi hata omukuxa kapwitthi ule." Owo aahikhalana nrromelo wa etthu. . . Muluku oomuvaha mapupha ale maili, ni aanisuwela etthu mapupha ale yaarow'aya omwiiraha.

<sup>109</sup> Moota ery'aya yoovirikana ni mutthu! Muluku oonivaha Eroho Yowarya, nto hiyo nlelo khanisuwela etthu Eyo enrow'aya onirela. Eyo ekeekhai! Ti yoohimalihey, etthu

Eyo enrow'aya wira. "Sothene simphavel'anyu, mwaavekelaka, mwaamini wira munimwaakhela, vano munoovahiwa." Xawaw'ole aaniwerya ororomela mapupha ovahiw'awe ni Muluku. Moosuwela mwah'aya? Kinoona wira, imaara sinci-ene, xawawe aahehererya. Owo aanisuwela etthu aahimy'awe. Nto hiyo nookhalana Eroho Yowarya nave khaneehenrye Yeeyo. Ti vaavo paahi vary'aya. Moone, vaakhanle wira naamuhiya ephattu ovara muteko mwa hiyo ntoko mwaxinama oniir'awe! Vekeekhai, owo onnisuwela ethu yoolipa-no, ni etthu yoohilipano.

<sup>110</sup> Vano owo aanisuwela erakamelo okhuma nipuro keemenly'aka, okhuma vaari kapwitthi aka, vaaniweryaneya owo okhala vamwirini vale ni nkaarowa omoona, tivo owo khukhala attikinyaka mapupha ale maalupale. Vano miyo khunweha, miyo khwira, "Mmiravo, nkaarowa owoopela. Nkireere okhala owiisiviha mwaha wa nyuwo!" Okisivela woona etthu erina ominyala wa yeeyo, etthu enrowa ovenya yaasuwelaka etthu eniir'aya. Khonoosivelani woona yeeyo?

<sup>111</sup> Mwaha wa yeeyo enikisivel'aya ekereja ya Pentekosite. Voohicala etthu olumwenku onihimy'aya, owiihana "masantu oophirikeya," itthu sothene sikina, awo anoovenya n'unyakula vamosaru, waattotopela Apwiya, okelela ohoolo. Okisivela yeeyo. Vekeekhai, weemererya yeeyo. Khivanvirikana wira ti pani, mukhale vaavo muhimye onamoona anyu, munvahe Muluku nttotopelo.

<sup>112</sup> Kaahimuweha xawawe ola eetteetaka vale, moosuwela, vakhani. Nto khwiiraneya oweha, wira khaakiwehaxa, owo aamooceya mwaha w'omwiiwa mureyi ule omutakhaliha, "Catta, catta, catta! Catta, catta, catta!" Ah, owo aaroomuweha paahi. Nto nuuvira okathi vakhani owo khuphweeleya ni yoowo, vano, etthu emosa paahi owo iiraly'awe waari otupha vancipale *siisaale*, khumoroza mapupha awe vaili, nto aahivikana mwiri. Vano owo khaamoroxe-tho mapupha emaara emosa, aavenxale mapupha awe paahi. Nto khula okathi ettheke yaavenyaaya, owo aavenya ni yeeyo. Vano miyo keemenle vaavale khunamuweha. Khula okathi ettheke jaarum'aya, owo aamurowa osuluxa vakhani; khattikinnye hata nipururu, aamuwela paahi, awelaka, awelaka, awelaka, mpakha okhala nlepa naamukhaani.

<sup>113</sup> Miyo keemenle vaavale, nto maithori khupacerya omora wiitho waka. Miyo khwira, "O Muluku, nla nipuro nuulupale okhala. Va ti nipuro onkisivela okhala. Vale Nyuwo muri mwa xawaw'ole."

<sup>114</sup> Moone, owo aarootupha paahi vancipale, khuroromela mapupha awe. Owo khaaveveleieye okhuma muthukumano mmosa arowaka mukina, ni orowa okhuma ekereja mpakha ekereja ekina. Owo aarookhuna vancipale paahi, nto khuhelela

mapupha awe mwa Owerya wa Muluku, khuhiya Eroho Yowarya, khimukuxa emuroihaka, arowaka, arowaka arowaka. Owo khwiihuluxa mureyi ula a malepa mwaamukhaani a vathi va, ookhala vathi; ohirina hata mapupha, ni ohinsuwela moota w'ovava. "Catta, catta! Mahiku a miirirya aavira. Khiivo etthu iyo ntoko Eroho Yowarya, eyo ti ya nihiku nikina nivinre." Oh, nvenxerye mapupha anyu paahi mwa Owerya wa Muluku, muhiye Eroho Yowarya yooventxereni osulu, murowaka murowaka. Owo khaakhanle wiiwa-tho hata mureyi wa malepa, mureyi wa vathi, wala etthu p'itthu entthun'anyu wiihana. Aahooceya ni "catta, catta" yeele. Oh, vakhalaru wira ekereja, nihiku nlo, enimooceya mwaha wa yeeyo, ni khusuwela moota w'ovenxa mapupha aya; ni okuxa mweettelo ni Muluku, khurowa Owaani, okhuma-vo. "Mahiku a miirirya aamala"? Mukileele liini. Murwe vooxeleliwa onileela yeeyo, khamanle? "Mahiku a miirirya aamala. Khiivo etthu iyo ntoko Eroho Yowarya. Olavula ilavulelo wiipaka waamini paahi," ti yeeyo tu awo ansuwel'aya. Vano, etthu yo wira ovenxa mapupha anyu paahi.

115 Owo khaaveveleiye, vano, okhuma nipuro arowaka nipuro. "Kinoorowa iwe koone sinto *ela*, ni kinoorowa iwe koone sinto *ele*." Owo aanisuwela tu moota w'ovenxa mapupha awe. Nto ti yeeyo tu murin'anyu osuwela moota wo wira mwaha wa Ovoniha wa Muluku, mwaha wa Eroho Yowarya, osuwela paahi moota w'ovenxa waamini wanyu mwa owerya ni anatiri a Muluku. Eyo enimookuxani yooroihakani osulu. Muroweke osulu paahi. Khula okathi eyo enrum'aya, hiyo ninoovenya nirowaka osulu, osulu ni osulu; mpakha muhinrow'anyu owerya niwiwa ela nno, "Catta, catta, catta! Mahiku a miirirya aamala. Nikhuru na masantu oophirikeya." Hata khamunrowa oxikha yeeyo. Munrowa okhala ottaiwenexa waavikana awo mpakha okhala woorakama woohiwiiwa. Munep'anyu onrowa ovenxiwa mpakha nipuro nimosa vaavo. . .

116 Oh, khweeli, Muluku ori mutuniyani mw'Awe. Nyuwo munnaamini yeeyo, khamunaamini? Oh, naamuwerya oviriha iwoora mw'etthu emosa yeeyo paahi. Nihaana otuphela ekina. Munnaamini wira Muluku ori mutuniyani mw'Awe? Vano, yootharana, Muluku ori mwa Masu Awe. Vano nwehe etuniya nto munoomoona Muluku. Vekeekhai, munoomoona. Vano Muluku ori mutuniyani mw'Awe.

117 Vano, Muluku ori mwa Masu Awe. Muluku onnisuka Masu Awe. Ti yeeyo emmukhaliha Bibilia eekeekhai. Ti yeeyo enwery'ahu omutharimula-no khula oohimutthuna Muluku, khula mulipa-oohaamini, khula Mmaka, khula Buda, khula mukhwiri, khula namakoha minepa, etthu p'itthu ekina, mwa Nsina n'Apwiya Yesu, ni okhaliha Masu ala makumi, okhala wira Muluku ori mwa Masu Awe.

118 Miyo kaamuvaanyihana, nihiku nlo, ni e—ekereja emosa ya muromolelo enaamini wira—wira ekereja ti eyaakhulelo, kahi Masu. Awo ahimnye wira aamulepa Bibilia. Bibilia aari e . . . aari ehantisi ya ekereja aya. Nto owo khwira, “Muluku ori Mukereja mw’Awe.”

Miyo khwira, “Bibilia ohimnye wira, ‘Muluku ori mwa Masu Awe.’”

119 “Wopaceryani naari Nsu, nto Nsu naari ni Muluku, ni Nsu naari Muluku. Vano Nsu naahiipaka erutthu khukhala ni hiyo.” Ti yeeyo. Owo aari Masu a Muluku, Nsu noolavuliwa na Muluku. Ni Muluku ori mwa Masu Awe. Khula natiri Muluku onimman’awe, Owo onnimukhapelela natiri Awe. Etthu emosa paahi erin’ahu wira, t’ila, hiyo ninkuxa Masu Awe mpakha mmurimani mwahu, ni ohihoverya Yaawo, masi waamini, nto Muluku onikhaliha Masu awo (yaawo akhanle Yoowo muhina mwa nyuwo) orowa ovara muteko ni okhumeleliha etthu ene yeeyo Owo ohimaly’awe.

120 Owo aahiira yeeyo mwa Abrahamu? Vano, Abrahamu, mulopwana mmosa a iyaakha miloko mithanu na mosa ni thanu, wala, owo hata ahinatthi, ahiiso, iyaakha miloko mithanu na miili ni thanu, owo ahinatthi omwaakhela natiri. Nto owo aahikuxa Masu yaawo mmurimani mw’awe khuhela vaavo iyaakha miloko miili ni thanu. Masi yaahikhumeleliha oratteene yeeyo aari natiri. Eyo ekeekhai?

121 Muluku ori mwa Masu Awe. Hiyo othene noosuwela eyo. Khanivo hata nipuro nimosa na Bibilia niniivirikanya Nneene. Kinnimuvaha mutthu ti mutthu khula etthu antthun’aya; kinoolaleya Ehapari yooreera ni okuxa soovahiwa sa mphento eyaakha ntero, ni omuvaha, khula emosa, mutthu okhanle okuxaka Masu a Muluku ovaanyiha Yaawo ni Masu a Muluku, wa miyo. Ti yeeyo. Khekhanle mmo. Ni kinnikhalanaka mutharamulo yoowo mwa iyaakha ni iyaakha; nlelo kinkuxa soovaha saka sa mphento. Okhala wira, khekhanle mmo. Nyuwo pooti okhala oohoveryaxa mwa ankhili anyu mmansinyu, okhala wira Bibilia ti . . . Yesu aahaaxukhuru Atithi Awe mwaha “wo owiipitiherya Yeeyo alipa oosuwela ni a ankhili, khiwuupululela anamwane wira esuwele.” Moone, Awo Masu a Muluku.

Masu ari ntoko Epyo.

122 Vano, mukuxe epyo. Nyuwo atthu va Olimani Onkela nsuwa, nyuwo mw’alimi aalupale. Vano, mukuxe murarance anyu. Vano, mukuxe murarance anyu, mwaapaceryaka okuxa, owo onkhala epyo. Munoohelela vathi, nto epyo eyo enrowa wiimiha mwiri wa murarance. Vekeekhai. Vano, ti siiso ery’aya. Vano, murarance ola, etthu emosa paahi muniirih’anyu, owo warakamaru ntoko yawinyu . . . isentiimeturu piili ni nuusu. Nkisuwenle ikhiilu kavi sa irarance mwiri mmosa oniim’aya ekumi aya yothene. Nrowe niire, ntoko nlikanyiho, ikhiilu ikonto muloko ni tthaaru. Vano,



iyo pooti ovikana wala ohiphiya, nkisuwenle; masi kiniira ikhiilu ikonto muloko ni tthaaru. Mwaanisuwela wira khula erarance enrowa okhala mmwirini mme eri memmo okathi owo waary'aya woorekama isentiimeturu piili ni nuusu? [Nipuro vahiitthu mufiitani—Mol.] Mwaanisuwela yeeyo? Vekeekhai, ti siiso. Vayi? Eyo enkhuma mw'enukuni. Vano, etthu emosa paahi ekhanle, owo oroophatteiwa tu, oxeiwa.

<sup>123</sup> Ni ohaana okumiha, onnuula maasi okhuma vathi, wira ophwanye yolya. Nto owo onnuula maasi okhuma vathi, ni ohaana owurya ovikana sintthun'aya. Nto khula okhati. . . 'okhala wira, ohaana okumiha. Nto owo waawuryaka maasi, onkumiherya irintta; onoowurya-tho maasi, onkumiherya mataakhuru; onoowurya-tho maasi, onkumiherya ithutu; onoowurya-tho maasi, onkumiherya irarance. Owo onoothikela owuryaka paahi, ni okumiheryaka. Masi, ohaana owurya.

<sup>124</sup> Ti siiso mulipa-oowaamini ory'awe, owo omphanyaneya eriyari ya Masu a Muluku. Amen! Nto owo aatthunaka etthu p'itthu, onoowurya paahi, ni okumiherya; onoowurya, ni okumiherya. Mutthu asareya Eroho Yowarya, sothene onrow'awe orumeela ekumi awe yothene eri mwa yoowo ene nto. Ayo, mulopwana. Etthu ene emosa paahi erin'ahu wira owurya ni owurya, ni owurya ni owurya, ni owurya mpakha ophwanya. Hiyo niphatteiwe mwa Kristu Yesu! Nto mwa omutaphulela waka Yoowo, Owo ti Ephattuwelo yoohimaliheyaya y'Ekumi. Ti yeeyo tu kinuupuwel'aka wira Owo t'okhanly'awe. Nto okathi oniphatteiw'ahu mwa Yoowo, Owo t'ohimaliheyaya! Ninoowerya okumiha mwa Yoowo, oreera murima, wiisumaaliha, ereerelo murima, ovilela, owerya, ovonihwiwa, [Nipuro vahiitthu mufiitani—Mol.] . . . natiri Owo omuvahaly'awe, 'okhala wira hiyo niphatteiwe mw'Epyoni ya Masu Awe. Nto Awo anookumiherya vekeekhai ele Muluku ohimmy'awe wira yaamukumiherya. Eyo Epyoo, Masu.

<sup>125</sup> Muluku ori mwa Masu Awe. Hiyo ninnaamini yeeyo, khaninaamini? Othene ahu ninnaamini. Munnimoona Muluku aakhulaka. Iyaakha sivinre, okathi Owo aahimenry'awe wira yawele, Pentekosite, yaamwaakhela Eroho Yowarya. Iyaakha ehinatthi yeeyo, mwa Yesaya, Owo iirale, "Nikano vasulu va nikano, yooruma vasulu va yooruma, vakhani va ni vakhani iwe. Muthanleke sooreera. Kinimwaalavulela atthu ala ni moolumo ookukuma ni ilavulelo sikina, nto nno ti Omumula." Moone, Owo aahihimya khalayi, vano Masu Awe khurwa khooniheriwa. Sothene, Mesiya aalaiheriwe, okhuma omatta w'Edeni, "Osuulu waarowa onyakatta muru w'enowa," sikina, yaahiraneya. Muluku ori mwa Masu Awe.

<sup>126</sup> Vano, Muluku ori mutuniyani mw'Awe, mwiire "amen" mwaaminiki vale.

[Muthukumano oniira, “Amen.”—Mol.] Muluku ori mwa Masu Awe. Munnaamini, mwiire “amen.” [“Amen.”]

127 Vano, Muluku mwa Mwan’Awe. Vano, Muluku aari mwa Mwan’Awe. “Muluku aari mwa Kristu, aataanihaka olumwenku ni Yoowo,” ti yeeyo enihimya Yoolempwa. Owo, Muluku onookhuruwa, ni aakhala mw’erutthuni, yaayariwe ni Maria harusi, vano Muluku khwiisooniherya Mwaneene mwa Kristu; wira ooniherye iye Sawawe—saari mikhalelo Sawe, wira ooniherye wira aaniphenta, wira ooniherye wira ovilela Wawe, wira ooniherye owerya Wawe, wira ooniherye ni aisooniherye Mmansawe. Muluku aakhala mwa Kristu, aataanihaka olumwenku ni Yoowo.

128 Kaahilavula ni muthiyana mmosa, nno okathi vakhani ovinre, ahiiso owo aahikikhaliha ookasoopa. Owo iirale, “Pastore Branham,” owo khwira, “Sinnikisivela ilaleeryo sanyu. Miyo, miyo ka... Kinnikhalaka mithukumano sanyu.” Masi owo iira mpantta wa ekereja emosa ya muromolelo ehinaamini wira Yesu aari a eMuluku. Nto owo khwira, “Ahe, Owo khaari a eMuluku.” Nto miyo khwira... Khwira, “Muneererya omukhalihaxa a Muluku.”

Miyo khwira, “Owo aari a Muluku.”

129 “Oh,” owo khwira, “mwenye, kinookupali wira Owo aari mutthu ooreera murima.” Ni nkinthuna woonanarihani; akina w’atthu awo axipatthani aka ooreera murima. Ti Siyensiya a eKristu. Nto owo khwira, “Owo, Owo khaari a Muluku.” Khwira, “Kinookupali wira Owo aari profeta, masi khaari a Muluku. Vano nyuwo muntthuna omukhalihaxa a Muluku.”

130 Miyo khwira, “Owo aari a Muluku ahiiso aari namawoka muulupalexa olumwenku otonko aya akhalana.” Ti yeeyo. Miyo khwira, “Owo aari a Muluku. Owo aahinvikana profeta. Owo aari Muluku vasulu va maprofeta! Vekeekhai, Owo t’ary’awe.” Miyo khwira, “Owo aari a Muluku.”

131 Vano owo khwira, “Vano, nyuwo muhimmye wira mwa ‘oottharihela mulipiheryo,’ ni wira mwaanaamini Yoolempwa.”

Miyo khwira, “Kinnaamini.”

132 Nto owo khwira, “Miyo kawooniheryani, ni Bibilia anyu, wira Owo khaari a Muluku, munookhalela onamoona wira kookhalana exariya?”

133 Miyo khwira, “Ayo, mulopwana. Vakhalaru wira Bibilia ohimmye wira Owo khaari a Muluku, nto kinoomwaamini Bibilia.” Nto miyo khwira, “Masi kihaana woona Yoolempwa.”

134 Owo khwira, “Mwa Yohani, mwa Yohani Oowaarya, Eyo ehimmye wira, ‘Yesu vaphiyaly’awe vamahiye va Lasaro, Owo aahinla.’” Ni khwira, “Moosuwela, vaakhanle wira Owo aari a Muluku, khaakhanle wunla.”

Miyo khwira, “Munna, ti vaavo munlipihery’anyu muupuwelo anyu?”

135 Owo khwira, “Ayo, mulopwana. Vano eyo ekeekhaii. Owo aahrowa vamahiye va Lasaro, Owo aahinla; eyo ehooniherya wira khaari a Muluku.”

136 Miyo khwira, “Yoohimya anyu ti yooyevexa ovikana esoopa epakiwe ni muuttutthi wa mwalyakhu okhwiye mwaha w’ovoliwa etala.” Miyo khwira, “Ahe, munnisuwela saana.”

137 Nto owo khwira, “Oh, Owo aari—Owo aari—Owo aari profeta, Owo aari mutthu ooreera murima.”

138 Miyo khwira, “Owo aahinvikana...Muluku aari mwa Yoowo. Owo aari mutthu, masi Owo aari mu—Mutthu a vaili. Mmosa, Owo aari mutthu; Eroho mwa Yoowo aari Muluku!” Miyo khwira, “Muluku aari mwa Kristu.”

Owo khwira, “Ah! Nnari!”

139 Miyo khwira, “Nkawehani, muhano, kinookuxa Yoolempwa anyu yeeyo. Owo aari mutthu, masi Owo aari Muluku—mutthu. Okathi Owo oronw’awe mpakha vamahiye va Lasaro, Owo aahinla ntoko mutthu. Eyo ekeekhaii. Masi okathi Owo ovennyaawe vale, khokolela makhata awe makhaani ookhurupuwa, khwira, ‘Lasaro, mukhumele ota nno,’ nto mulopwana mmosa ookhwa, aakhwiye khuvira mahiku maxexe, khutthikela ekumi, eyo yaari onvikana mutthu. Mutthu khaawerya wira eyo. Ole aari Muluku mwa Mwan’Awe.”

140 Owo aari mutthu okathi aarwiiy’awe vamwaako, avoliwe-ene etala, aphaavelaka etthu wira olye, awehaxaxaka mwiri wira ophwanye etthu alye. Owo aari mutthu okathi aavoliw’awe etala. Masi okathi Owo aakunx’awe ihopa piili ni iphawu thanu khwaalyiha atthu ikonto thanu ole aari oomuvikana mutthu. Ole aari Muluku mwa Mwan’Awe. Vekeekhai aari yoowo!

141 Owo aari mutthu okathi aarupaathaly’awe vale vakalawani vale ohiy’ule, ikuru saahikhuma mwa Yoowo, mpakha Owo otteetheya vahaawery’awe...hata mawimpi khiyaamuvexale, ottikinyiwa mukalawani mme yaamukhaani, ntoko erooya ya esuupha mphareya mme mwa ikuru. Axetwani ikonto muloko a mphareya yaahilapha wira yaammupwiniha Owo ohiy’ule okathi waarup’awe. Owo aari mutthu okathi aary’awe arupaka ni ookhulumuwa. Masi vapwehaly’awe nnawu Nawe vantthankani v’ekalawa, khuweha osulu khwira, “Mmaale, mwiikhalele,” nto ittheke ni mawimpi khumwiwelela Yoowo, ole aari oomuvikana mutthu. Muluku aari mwa Mwan’Awe! Vekeekhai mara!

142 Owo aari mutthu okathi okhwiyy’awe vale vamwiikimanyo, anelaka omoreliwa ikharari. Owo aari mutthu okathi okhwiyy’awe. Owo aahikhuwela ntoko mutthu, Owo aahoona owereya ntoko mutthu. Masi voosiisu wa Pasikha okathi

opwanyunly'awe o...okhwa, omooroni, ni ikanyeryo sa mmahiyeni, khuhihimuwa; Owo aahinvikana mutthu, Owo ohooniherya wira aari Muluku!

Akhalaka, Owo ookiphenta; akhwaaka, Owo  
 ookoopola;  
 Vavithiw'awe, Owo ooroiha itampi saka  
 ottaiwene;  
 Ahihimuwaka, Owo ookikhaliha naxariya  
 mahale-ene voohimala;  
 Nihiku nlo Owo onimoorwa, oh, nihiku  
 noovuwaxa!

<sup>143</sup> Muluku aari mwa Mwan'Awe, aataanihaka olumwenku ni Yoowo. Munnaamini yeeyo? Vekeekhai. Muluku aari mwa Mwan'Awe. Naakuvaka, okathi ahu onoomala. Etthu emosatho. Hiyo . . . Munnaamini wira Muluku ori mutuniyani mw'Awe? Muluku ori mwa Masu Awe? Muluku aari mwa Mwan'Awe?

<sup>144</sup> Vano, Muluku ori mw'atthu Awe. Vaareera. Ninimoona sinto Owo onnikhuruwela mw'atthuni siiso ntoko Owo oniirel'awe epattuxelo. Atthu ti mpante wa epattuxelo Awe. Vekeekhai, ti yaawo. Vano nwehe, Muluku aari mw'atthu Awe.

<sup>145</sup> Aari pani ohiyu mukina mwa yoosoma ahu, mwa Eliya, okathi mwanamwane mmosa aakhwiw'awe mwaha wo woopa nsuwa, khwaataleliwa iwoora iwoora sene voolilini va profeta, okathi mulopwana mmosa, iihaniwa "Eliya," eettaly'awe nno ni nno, osulu ni vathi, khuphiteeriha erutthu awe mwa mwanaman'ole ookhwa, vano owo khutthikela ekumi? Ole aari Muluku mw'atthu Awe. Vekeekhai aari yoowo.

<sup>146</sup> Aari pani, okathi Petru Oowaarya, murummwa, mulipaootha ihopa oohisuwel'etthu..Bibilia ohimnye wira, "Owo aari oohisuwela etthu ni oohisoma." Aari pani, okathi eettaly'awe mphironi, nto atthu khuyaapweha aretta v'erukuni ya mulopwan'owo, ni awo khunapenuwa? Yaari eruku ya mutthu yaavoniha? Aari Muluku mw'atthu Awe, aavoniha.

<sup>147</sup> Aari pani mwa Paulo Oowaarya, okathi yaakuxiw'aya v'erutthuni vawe maleeso ni ikuwo, ni wiixatheeriwa aretta? Muluku aari mw'atthu Awe. Awo yaanimusuwela Muluku mwa Paulo Oowaarya. Vekeekhai, yaanimusuwela.

<sup>148</sup> Aari pani okathi nikhuru nimoso n'anamoova yaavekel'aya, khukuxa Masu a Muluku khurowa oPentekosite? Awo yaahiwalasa mikhora sothene, ni icanela sothene saahiwaliwa, vano awo yaarisa memmo mahiku muloko. Naanaanoru waahiiwanyeya oruma okhumaka Osulu ntoko epheyo, enoopa n'ikuru, khusarya mpaani mothene awo yaathukumann'ayamo, malumi ookawanyeya yaahaamorela, ntoko mooro. Vano awo yaahikumelasa mphironi, memmo yaatuthuwaly'aya, khukhumelasa vale, elaleyaka Ehapari yooreera ni yiirasaka

siiso ntoko nikhuru n'atthu oohapaliwa. Yaari exeeni iyo? Muluku mw'atthu Awe. Muluku eetteettaka eriyari y'atthu Awe.

149 Muluku ori mwa nyuwo. Muluku, Eroho Yowarya, eri mwa nyuwo, yeetteettaka vano, yaataanihaka olumwenku ni Yoowo.

150 Exeeni eniwiiriha arumeyi ala oowuupuxeriwa olaley Ehapari yooreera? Exeeni eniwiiriha? Khino, yaatonko, ohapaliwa; yaatonko, omuttikha cuuku; yaatonko, okhala athu ootakhala; naanaanoru, etthu khurukunuwa! Nto awo amphwanyaneya va, elaleyaka Ehapari yooreera ni evahereryaka makhalelo aya. Nto akina aya, khino, akhalaka oohaawa sinwery'aya. Yaary'ene alipa a nakoso ni yaamuwerya okhala mathaaciri, weettiha ikaaro suulupale ni okhalana mihakhu, masi awo aroovahererya khuhiya. Mwaha wa xeeni? Muluku ori mw'atthu Awe, aataanihaka olumwenku ni Yoowo. Muluku ori mw'atthu Awe.

151 Exeeni iyo enimmoroxa mwamuthiyana wala mwamulopwana, vano owo onavenya, ni wiitho wawe onaarya-wo ntoko eveela, ni olavula elavulelo owo ohinsuwel'awe etthu, ni mukina onoovenya vathi va muthinto mmosaru wa muupuxeryo n'uhimeerya mutthaka ekereja Awe? Muluku mw'atthu Awe. Amen.

152 Exeeni iyo enoorwa vaplataforma va, muthukumano ti muthukumano, n'upaka miiriirya imosaru Yesu aapakaly'awe Owo ary'ene vathi vaava? Ti Muluku mw'atthu Awe. Hata wira mwaattelo xeeni waarow'aya okhala mwa miyo, ohaana okhala mwa nyuwo, nave. Okhala wira, khenrowa ovara muteko mwa yoomi paahi mmansaka. Entthuneya nyuwo ni miyo vamosa, wira niire. Ti yeeyo.

153 Othene hiyo vamosa, Muluku mwa hiyo othene! Muluku, kahi paahi mwa Metotista wala muPatista, wala muPentekosite wala muPrespiteriyaano, masi Muluku ori mwa khula mulipa-oowamini aakhanle Eroho Yowarya. Owo ti Muluku, Eroho Yowarya, mw'atthuni, aataanihaka olumwenku ni Yoowo.

154 Nwehe moota Owo oniwiirih'awe athu waamini. Mwa itthu imosaru Owo iiraly'awe w'ale oopacerya oPentekositeni, Owo onniira w'ale olelo, enamuna emosaru. Awo ahaakhela Eroho Yowarya mwa enamuna emosaru, ithoonyeryo imosaru ni mitikiniho sinnaatthara.

155 Muluku mutuniyani mw'Awe. Munnaamini yeeyo? Muluku mwa Masu Awe. Munnaamini yeeyo? Muluku ori mwa Mwan'Awe. Munnaamini yeeyo? Muluku ori mw'atthu Awe. Munnaamini yeeyo? Muluku eeteettaka mwa sothene!

156 Tivo Filipe iiraly'awe, "Munooniherye Atithi, vanoosisivela."

157 Miyo kinnisiveliwa olelo oweryaka omoona Muluku mapuro othene kinweh'aka! Nkinimoona Yoowo paahi, masi

koomukwannya Yoowo ni koosuwela wira Owo ori vaava! Ntoko poweeta sihimaly'awe, "Nyuwo munikikoha moota kinsuwel'aka wira Owo ookhala, Owo onkhala mmurimani mwaka." Kinniweha Eroho Awe ni woona Eyo okivaha niwoko, okeetiherya. Nyuwo munivahiwa niwoko ni Etthu, Eroho Yowarya. Muluku ori vaava olelo, apatthani. Muluku ori vaava.

<sup>158</sup> Owo ori mwa opattuxa wawe nipuro nlo, elimwe ni eyiita, mataakhuru, ithutu, axipalame, axinama. Owo ori mwa otupweela wa nsuwa, ophattuwa wa nsuwa. Owo ori mwa mukhalelo wa nsuwa. Owo ori mapuro othene! Muluku ori mapuro othene! Owo ori mutuniyani mw'Awe.

<sup>159</sup> Muluku ori mwa Masu Awe. Mutthu ti mutthu onootthara Masu Awe, khula natiri. . . Mukihiye kihimye sinuupuwel'aka kihimyaka ela. Mwakhalanaru muupuwelo wooloka wa khula natiri eeMuluku a Muluku, onookhumeleliha. Ti yeeyo enuupuwel'aka wa Masu Awe. Mmukuxe khula natiri Mu, ni mukhalane muupuwelo wooloka wa yoowo, Muluku onoomukhumeleliha wa nyuwo. Muluku ori mwa Masu Awe.

<sup>160</sup> Muluku ori mwa Mwan'Awe. Owo aari a Muluku. Owo Mwaana a Muluku. Kinnaamini yeeyo ni sothene siri mwa miyo. Kinnaamini. Ayo, mulopwana. Owo khaari ovikana. . . Owo aari profeta. Vekeekhai, Owo aari profeta, Owo aari mulaleyi, Owo aari mulipa-oowiipa. Owo aari—Owo aari Muluku, Muluku owiisooniherya mw'erutthuni. Muluku aarookhuruwa mw'erutthuni, wira aataanihe olumwenku ni Yoowo. Vano Mwaan'ole oothamaleya a Muluku khukhwa. Nto, okathi Owo okhwiy'awe, Owo aahivahererya ekumi Awe. Owo aahihihimuwa nihiku na Pasikha, vano Muluku khuvenxa erutthu Awe khuhela moonoo Awe woolopwana, khuveleeliha Eroho Yowarya wira athikele wiisooniherya Mmansawe eriyari y'atthu.

<sup>161</sup> Nto Eroho emosaru yaari mwa Yesu Kristu eri eriyari ahu olelo, yiisooniheryaka Mmansaya w'atthu voohihiyererya, ni ithoonyeryo imosaru, mitikiniho mimosaru, aavahaka Eroho Yowarya emosaru, alavulaka ni ilavulelo s'enamuna emosaru, avahaka enamuna emosaru y'otaphulela, yoonaka soowoona, yeetteetaka, yaavonihaka aretta, siiso ntoko Owo siiraly'awe wopaceryani. Muluku ori mw'atthu Awe!

<sup>162</sup> Hiyo ninweha exeeni nto, "Munooniherye Atithi vanoonisivela"? Hiyo ninniwoona Atithi. Hiyo ninniwoona Atithi.

<sup>163</sup> Miyo ka—miyo kaawehaka va ni woona otupweela wa nsuwa, kinniwoona Atithi. Koonaka ophattuwa wa nsuwa, kinniwoona Atithi. Kaaiwaka okhuluma wa mutakhwani wa maxeni, kinniwoona Atithi. Koonaka ithutu iye siphuwaka, kinniwoona Atithi. Khamuniwoona?

<sup>164</sup> Kinniwoona Awo mwa Masu Aya. Khula okathi kinikuxa'aka Masu Aya wa natiri, kinniwoona Atithi.

165 Kamuweha Yesu, kinniwoona Atithi yiisooniheryaka Mmansaya mwa Mwaana.

166 Kaawehaka atthu Aya, kinniwoona Atithi; kinniwoona Awo evaraka muteko eriyari y'atthu Aya, yiisooniheryaka Mmansaya, ekelelaka ohoolo. "Munooniherye Atithi"? Awo ari va oxekuw'ola, evaraka muteko eriyari y'atthu Aya, mw'atthu Aya, n'atthu Aya, vasulu v'atthu Aya. Aleluya! Muluku ori mw'atthu Awe.

167 Nivekele. [Nipuro vahitthu mufiitani—Mol.] Attotopeliwe Muluku! Nyuwo munnimphenta Owo? Vaareera.

168 Kookupali wira Billy ookileela y'ovekela miloko mithanu . . . Vaareera. Ettikitti ya mavekelo nummaru nimosa. Nvenxe ntata, voowaakuva, wira noone naanaano, ni mukele naanaanoru muliinyani mwa mavekelo. Ninrowa woona etthu wiiraneya. Miyo . . . Munnilipelela yeeyo? Ettikitti ya mavekelo nummaru nimosa, t'ani orina? Muthiyan'ola nno, mookhalana ettikitti ya mavekelo nummaru nimosa? Kaakoherya ettikitti ya mavekelo nummaru nimosa. (Xeeni—yaari eleetera xeeni?) E.

169 Ettikitti ya mavekelo E, nummaru nimosa, nvenxe ntata. Nummaru na piili. Vaareera. Nummaru na tthaaru, nummaru n'exexe. Murwe nno, munnitthuna? Nummaru na thanu, thanu na mosa, thanu na piili. Ti yeeyo, nvenye mweemele. Kiihanakarua, nvenyeke. Thanu na piili, thanu na tthaaru, thanu na xexe, muloko, muloko n'emosu, muloko ni piili, muloko ni tthaaru, muloko ni xexe, muloko ni thanu, muloko ni thanu na mosa, muloko ni thanu na piili, muloko ni thanu na tthaaru, muloko ni thanu na xexe, miloko miili, miloko miili n'imosu, miloko miili ni piili, miloko miili ni tthaaru, miloko miili ni xexe, miloko miili ni thanu, mutathaane paahi vano.

170 Akavi ahirina ettikitti ya mavekelo, nvenxe matata. Munnaamini wira Muluku ori mw'atthu Awe? Muluku mmosaru yoole eettale oKalileya, mwa Yesu Kristu, munnaamini wira Owo ori vaava olelo, mwa nyuwo, Eroho emosaru yaari mwa Yesu? Owo Mwaana a Muluku ooyariwa ni harus; ni nyuwo mookhalihwa aana, mwa Yoowo. Eroho emosaru yaari mwa Yoowo, eri mwa nyuwo. Vaareera.

171 Miloko miili ni thanu, miloko miili ni thanu na mosa, miloko miili ni thanu na piili, miloko miili ni thanu na tthaaru, miloko miili ni thanu na xexe, miloko miraru, awo erwe. Niniwihana siiso wira nihikhalane ophunyana, moosuwela, weettasa vanci-ene. Vaareera, miloko miraru, miloko miraru n'imosu, miloko miraru ni piili, miloko miraru ni tthaaru, miloko miraru ni xexe, miloko miraru ni thanu, miloko miraru ni thanu na mosa, miloko miraru ni thanu na piili, miloko miraru ni thanu na tthaaru, miloko miraru ni thanu na xexe, miloko mixexe. Ti yeeyo, mweette paahi murowaka iwe munooheliwa

muliinyani. Mwaahiweryeke weetta, vano, mmuleele mutthu, munookuxiwa.

<sup>172</sup> Vano, akavi ahirina ettikitti ya mavekelo, nvenxe ntata, mwiire, “Kintthuna wira Muluku akivonihe oxekuw’ola.” Nkincala wira mw’ani, otthu onikhum’anyu, khula etthu, mwiire paahi, “Kintthuna wira Muluku akivonihe. Kinnaamini.”

<sup>173</sup> Vaareera, miloko mixexe mpakha miloko mithanuvano, arwe. Atthu othene arina ettikitti ya mavekelo, evenye erwe nno naanaano, nyuwo murina ettikitti anyu ya mavekelo. Ninrowa olipelela okathi vakhani paahi nto ninoopacerya naanaanoru muliinyani, waavekelela aretta.

<sup>174</sup> Vano, nihaana wira nimalin’he-ene minuutu muloko wala muloko ni mithanu sinttharelana, tivo nvilele ni hiyo vakhani, ni nvekeleke ni sothene siri mwa nyuwo. Vano kintthuna wira nwehe epante ela nno, khula mmosa a nyuwo vano. Vano muupuwele. . .

<sup>175</sup> Ookhala muletto va ohinatoko okhala hata muthukumano mmosa khalayi? Aakhala kamosa-kamosa, nwehe paahi. Khanireere otteeliwa murima okhala ni nyuwo. Niroromelaka wira munoo—munokelela ohoolo ni muthukumano sa enamuna yeela, eyo ti wi, vaavo Eroho Yowarya. . . Mwaahikhale mu—mutthu a ekereja emosa eri ya Ehapari yooreera yoomalela, ni mwa mukhalelo, nnimoovekelani, woosivelakani enamuna ya muteko vaavo Eroho Yowarya enr’aya ni weetteetta. Nkaaweheni arumeyi ala va, awo—awo ankhalasa elapo ela yothene nno, ni awo ano. . . (Kooxukhuru, munna.) Awo ano—awo anoopathela owaakhelani mukereja mw’aya.

<sup>176</sup> Vano kintthuna kihimye ela, wira khula mutthu orukunxale murima esumana ela, khula mutthu orukunxale murima vaava esumana yeela, vano, nkawehani nikhuru nla n’arumeyi, awo—awo aneemererya etthu emosaru miyo kineemerery’aka. Hiyo khanivirikanne hata vakhani. Hiyo nri mmosaru mara. Ninaamini Ehapari yooreera yoomalela, opatiiso wa Eroho Yowarya, itthu iya sothene. Arumeyi othene ala va, hiyo othene nri mmosaru tu. Ni nintthuna wira mwiitakanihe mukereja mwaya wira mukeleleke ohoolo. Vano awo t’a. . . muSamariya ooreera murima ohoorwa, oohela makhura vanikhwattani. Masi owo ohookuxani vano, ni ontthuna wira mukele emosa wa itthoko simmaka aletto nno, ewaattamelanxeni. Owo oomuliva mukukhula wira ookhapeleleni, tivo owo ooliva; owo ohaakhela Eroho Yowarya, ookhalana eparakha ya Muluku, ni ekumi, ni muupululo, owo onoowerya olyiha munep’anyu! Vano murwe naanaano va mwiitakanihe emosa wa ikereja, nto eyo eno—eyo enookhala etthu emosa yootepa oreera mukhanly’anyu wira okhaliha munep’anyu wooyihiwa ni okelela ohoolo. Muluku akhale ni nyuwo.



177 Vano, hiyo khaninihimya okhala etthu p'itthu woohikhala munn'inyu. Vano, Okuxiwa warwa olelo, nto Muluku aarowa waakuxa ale amphwanela waaroiha owaani toko, miyo kaarowa okhala ookiserya okhuma vaplataforma. Ti yeeyo. Miyo kiyariwe woohikhala okathi aya. Miyo... Nyuwo mwa, anciene a nyuwo arumeyi aPentekosite, munnunwe okivikana miyo, iyaakha sivinre mwaari nno mmuttettheni, mulaleyaka, okathi olupatthiwa wahaareery'aya, nyuwo mwaapattha ephiro kinvir'aka-mo. Nyuwo mwaaleela atthu wira itthu iya saamukhumelela. Nyuwo mwaahaana ovira mithinto sothene sa itakhwa ni itthu, ni makuttha a maluku a khula enamuna. Munnona? Miyo ka mwaana tu. Nto nyuwo mw'ale, nyuwo mwa axinna mu—muruhale yeela. Nyuwo mwa axinna alopwana n'athiyana mwiirale itthu iya. Nyuwo murimwaaleela atthu paahi, khwaaleela wira yaamoora. Nyuwo mukhalin'he mulipiheryo. Mmosa ti... onihela mulipiheryo, mukina ti kalapinteero, mukina ti mulipa ooviriha maasi, mmosa ti mulipa-oohela maluuxu. Empa ya Muluku enimweemexiwa. Munnona? Nto vano nikelelaka ohoolo, ni khula mmosa ookhalana nipuro nawe. Nto vano hiyo—hiyo nintthuna wira nyuwo atthu mwaalemelihe ni mwaattitimihe axiin'ihu ni ikereja iya. Ni muhiye Omwene wa Muluku wunnuweke ni wuncerereyeke voohihererya, ti mavekelo ahu.

178 Vano, miyo nkinwerya ovoniha. Ovoniha woouthummwa ni Eroho Yowarya. Akavi ansuwela yeeyo? Kristu ohiira oKalvario. Etthu emosa paahi, khino axilopwana ala va, awo arumeyii, awo yaawerya okuxa Masu a Muluku. Nkaarowa... Nkaakhanle weererya okhala ohoolo waya ni Masu a Muluku, ni etthu p'itthu yovirikana; okhala wira, awo ahiihaniwa, owo ti muteko aya, awo annilaleyaka, awo annisuwela etthu anihim'y'aya. Tivo miyo kiniwelela paahi etthu awo anihim'y'aya, ni wira "amen" n'ukelela ohoolo, 'okhala wira awo a—awo atthu a Muluku. Miyo kinaatthara yaawo, ni ophwanya wira ari mBibiliani, ni anihimya Ekeekhai.

179 Ahe, vano, nkiri wira kilaleyaxeke. Masi yoovaha aka ti yoovaha yo woona. Eyo e... Yesu aari mulaleyi. Owo aari namoona nave-tho. Nto mwa mpantte aka, okhalaka wira nkisomme voophiyerya wira kilaleyake, masi kookhalana yoovaha yo woona itthu khalayi ene, sinihimya s'ohoolo ni sinihimya khalayi ene.

180 Maana, mBibiliani, Ehimmwe wira, "Yaahirummwa arummwa, maprofeta, anamalaleyaka, awiixuttihi, amukukhula, othene ala wira alikanyiherye Ekereja." Muluku aahenle Mukereja. Vano, sookhala soovaha thanu na xexe, nikhanly'ahu wiixaatheryaka matata, ni sikina, ni ovekelaka voolipiherya soovaha sootepa oreera, ni wooniherya siiso. Masi iya sikina ti soovaha sithomeliwe sa Muluku, Muluku onhela Mukereja.

<sup>181</sup> Wa okathi onoorwa, Owo . . . Yohani Mpatisa, aari mahoolela oosuwanyeya a okathi ule. Muluku aroomutthokiha khalayi ene wira avare muteko yoowo. Munnaamini yeeyo? Vekeekhai, Owo aahimutthokiha. Yesu ohimye wira, “Mwaaronwe omoona profeta?” Khwira, “Onvikana profeta.” Munnona? Yohani khaasuwenle eyo, masi Yesu aahisuwela. Munnona?

<sup>182</sup> Ni Yeremiya, owo ahinatthi oyariwa, Muluku iirale, “Miyi kihoosuwelani, khooreerihani, khookhalihani profeta a maloko.” Eyo ekeekhai, kehiyo?

<sup>183</sup> Vano okathi Yesu aary’awe muumu elapo ya vathi, Owo iirale, okathi waarow’awe, Owo iirale, “Woohala okathi vakhani, olumwenku . . .” Muhiliyale yeela, mpatthani muKristu. “Woohala okathi vakhani, nto olumwenku khunrowa okoona-tho; masi nyuwo munookoona, maana kinookhala ni nyuwo, mwa nyuwo, mpakha omala olumwenku.” Owo oohimya yeeyo? Owo aarowa okhala ni hiyo mpakha omala olumwenku. Bibilia ohimye wira “Owo mmosaru nsana, olelo ni mahiku othene.” Eyo enihimya wira, “nikano nimosaru, nimosaru mwa owerya.” Etthu ene paahi evirikanne mwa Yesu olelo elapo ya vathi, ohiya ele Owo aary’awe okathi ule, olelo Owo ori vaava ntoko Eroho Yowarya. Erutthu Awe ekilanthe moon woolopwana wa Muluku Wirimu. Nihiku nlo Owo onimoorwa, nto ale ari mwa Kristu anoohihimuwa erowe ni Yoowo. Munnona? Ti yeeyo enweherery’ahu, nihiku nenlo. Masi Eroho Awe, ni owerya Waya wothene ni wiisooniherya, enivahiwa Erutthu y’alipa-oowaamini mulaponi mothene.

<sup>184</sup> Vano, Nlaikha nla n’Apwiya: Nlo naahipakeke ni naahivareke miteko mimosaru Yesu ovanry’awe, weso Eyo kehiyo Eroho yaari mwa Yesu, masi vakhala wira *ennivara* miteko imosaru Yesu onvar’awe! Okhala wira Owo ohimye wira, “Ole onikaamini Miyi, miteko sinvar’aka, nave-tho owo onoovara.”

<sup>185</sup> Moosuwela wira Bibilia onnihimya, ekapiitulu emosaru, Yohani 14, “Miteko sinvar’aka, nave-tho owo onoovara; hata *soovikana* iya owo onoovara, maana Miyi kinrowa w’Atithi Aka.” Koosuwela wira Mwene Yakopo onihelavo “suulupalex.” Khivaakhanle okhalaka suulupalex; oopacerya onihimya “soovikana.” Okhala wira, Owo aahimaaliha elapo, Owo aahaahihimuxa ookhwa, ahe, sothene pahi. Khimwaakhanle ovaraka suulupalex onvikana Owo sivanry’awe. Masi Ekereja yaamurowa ovara soowaatta saya, okhala wira, okathi onkhalan’ahu muthukumano va, onnikhalaniwa muthukumano w’Afrika, sinookhalaniwa oBrasili, siri mulaponi mothene, moone, ’okhala wira saamuweryaneya okhala *soovikana*. Muluku aisoonihenrye mwa Mutthu mmosa okathi ule, Mwan’Awe Yesu; vano Owo oniisooniherya Mukereja mw’Awe, mutuniyani. Masi Eroho emosaru envara miteko imosaru! Nihiku nimosa . . .

186 Wa nyuwo muhirina ettikitti ya mavekelo. Vano, yookhalatho etiikitti emosa ya mavekelo va—vamuthukumanoni? Yakhala vale, muhaana okela muliinyani. Nyuwo muhirina ittikitti sa mavekelo, aahikhala muthiyana mmosa . . .

187 Nrowe niire—nrowe niire sa, khenisommwa siisa, masi muthiyana mmosa aahitoko okhalana ovuuva ephome, ni khaasuwela moota aarow'awe ophiya wa Yesu. Masi owo khwira, “Kakwanyaru nlaya Nawe, kinnimwaamini Yoowo, kinoovona.” Akavi atonko osoma ehantisi yeeyo? Vano, vekeekhai, noosoma.

188 Nto, vano, owo aahipunyeerya vamuttitthini, ni aahipunyeerya aaviraka alipa-oouwulumela othene, khukwanyana nlaya Nawe. Vano, nlaya na oPalestina ninkhala noolenleya, awo yaanikhalana ekuwo ya muhina. Vano, Owo khoonale eyo v'erutthuni, masi Owo iirale, “T'ani okikwanyale?” okathi omukwanyaly'awe Owo khutthikela vamuthukumanoni. “T'ani okikwanyale?”

189 Nto, vano, Petru aahimpwapwela, khwira, “Pwiya, xeeni Nyuwo ohimya etthu siiso? Vano, atthu othene anookwanyani Nyuwo, vano Nyuwo muniira, “T'ani okikwanyale?” Owo aahimpwapwela Owo, Bibilia oohimya.

190 Owo khwira, “Masi kinnoona wira kootteettheya, ikuru sookhuma mwa Miyo.” Vano Owo khuwehaweha mapuro othene vamuthukumanoni mpakha Owo omuphwanya mwaamuthiyana owo. Nto Owo khumwiirela, “Waamini wanyu woowopolani.” Owo aahikhalana ovuuva w'ephome. Munnuupuwela yeeyo? Vano, akavi . . .

191 Nwehe, anamukuttho ala va, nyuwo othene mwa mapastoore. Axinna mapastoore, Bibilia ohimye wira “Yesu Kristu mmosaru nsana, olelo, ni mahiku othene.” Eyo ekeekhai? Ni Bibilia onihimya wira “Owo Namukuttho Muulupale, okilantho moonoo woolopwana wa Muluku vano, alapelaka olaphulela wahu.” Owo Namukuttho Muulupale onwerya okwanyaniwa ni owereya wa iretta sahu. Eyo ekeekhai? Munnoona yeeyo? Namukuttho Muulupale. Vano, vakhala wira Owo mmosaru nsana ni mahiku othene, enamuna emosaru ya ekwanyelo yaamuruuha sookhumelela imosaru. Eyo ekeekhai?

192 Vano munimuweha Yoowo. Mwaarowa omukwanyana sayi Yoowo? Ni waamini wanyu. Mookole ntata mwiire, “Pwiya Yesu, kookhalana yoothuna vooriihi—vo murima.”

193 Nwiriyaane. Nvekele ela. Muhiivekelele mmansinyu; munvekelele mutthu mukina. Nrowe nikuxe siiso. Kahi mmansinyu; munvekelele mutthu mukina. Eroho Yowarya yoone yeeyo. Munvekelele mutthu mukina paahi. Amosa-smoa w'ale oophentiwa anyu, wala mutthu munsuwel'anyu wira ori nipuro nlo, wala etthu siiso, munvekelele yoowo. Moone,

wira musuwele. . . muhi- . . . Khivantthuneya awo okhala vaava. Muluku onniwa mavekelo. Owo onnisuwela ethhu envekel'anyu.

<sup>194</sup> Akavi mpaani mu ari amalapo wa miyo, kihinsuwel'aka hat'etthu ya nyuwo? Nvenxe ntata. Kooxukhuru. Kinoona wira, khula mutthu. Vathi va eliinya ela ya mavekelo, othene anyu munnisuwela, munsuwela wira ka mmalapo wa nyuwo, nvenxe ntata. Miyo nkinoosuwelani.

<sup>195</sup> Vano, nyuwo munnisuwela, vakhala wira ekwanyelo emosa ya mwaamuthiyana mmosa yaahimutteetheiha Yesu Kristu Mwaana a Muluku, owerya waahimukhuma Yoowo (*owerya* "ikuru"), eliinya eyo yaarowa okiiriha exeeni miyo, natampi oopoliwe ni mahala? Moone, vo t'uri otaphulela wanyu, "Soovikana iya munoovara." Munnona? Eyo vo. Vano, vaakhanle wira kaahaana okuxa nuusu na eliinya eyo ya mavekelo, mwa olamula sa mmurimani, khino kaamuteexiwa kikumihiwe. Eyo ennickettheiha. Yookhala ethhu ya yeeyo. Nkikhanle wira yothene eyo. Masi kinoowerya omuvekelela khula mmosa. Ti yeeyo entthun'anyu, khula enamuna, kahi yeeyo mw'atthu?

<sup>196</sup> Wiixaatherya matata. Vano, Yesu, Owo khahimnye wira, "Mwiixatherye matata nvekele." Owo ohimnye wira, "Ithoonyeryo iya sinimwaathara ale anrowa waamini, yawiixaatherya matata aretta." Khonahimyeke wira "mwaavekelele"; paahi "owiixaatherya matata." Orummwa wa ovekela ti, "Owiihana ahumu a mukereja, khwaatikithela makhura ni waavekelele," eyo ti ya ekereja. Masi yoovaha y'elaleeryo ya ovoniha ti paahi "owiixaatherya matata aretta." Hiyo noosuwela eyo. Kahi "waavekelele"; "Owiixaatherya matata, ithoonyeryo iya sinimwaathara!" Vano, masi eyo e. . .

<sup>197</sup> Nrowe noone, t'ani. . . Munna Borders, aani? Vaareera. Wira Eroho Yowarya ewerye opacerya paahi, ni yeetaka eriyari ahu.

<sup>198</sup> Vano, nkawehani, nkinthuna wira hata mutthu etteetteke. Xontte, vano, mapuro othene, mukhale oomaala saana, mukhale oottittimiha. Vano, kinihimya wira, Eroho Yowarya yiira ethhu p'itthu, munatthuna omuttotopela Yoowo, ti yoolikana, muhaana wira siiso. Masi muheetteetteke. Mukilaathi mmaale. Okhala wira, khula mmosa a nyuwo eroohoo. Vano nto mureeriho wa Eroho Yowarya onimoorwa ni, wira, mutthu mmosa ottuli iwo iiraka, "Kiireke ti yoolikana," kinnoona yeele vaava va. Mutthu mmosa ottuli iwe airaka, "Heyi, John, munnaasuwela *Alexe* ni *Alexe*? Miyo kaari *lexe*." Moone, eyo enootepanya.

<sup>199</sup> Moone, okhala wira, vakhala wira Eroho yuulupale y'Ekumi Ehinimala eri ni hiyo, ni Eyo yookireeriha mwaha w'etthu, nto kinimoona pahi ntoko okimana murima. Moone, nyuwo. . . Ti siiso miyo—miyo kiniphwany'aka. Moone, nyuwo munoosuwelani Owo. Nto mwa yeeyo, mwaamuvekelaka Yoowo, emahala ni waamini wanyu onnimukwannya Yoowo; nto Owo paahi. . . Miyo kinimwiivahererya paahi mmansaka, vano

Owo onoolavula, n'upacerya okileela. Vano nyuwo mphuke sinto ti yoolikana wala nnari.

<sup>200</sup> Vano Owo aira vale yeela emaara yookiserya, vano ninoorowa, ninoohalela, muthukumano ohanle omala minuutu vakhani sinttharelana, akavi anrowa wira, “Kinimwaakhela ni murim'aka wothene, ni waamini wa sothene kimp Pavel'aka”? Muluku ooreeriheni vano.

<sup>201</sup> Tithi a Wirimu, mmatatani mw'Anyu kinnivahererya muthukuman'ola. Kinnikuxa khula erooho vathi wo weettiherya waka, wa nlemeliho ni ntittimiho wa Yesu Kristu. Kinvekela mwa Nsina Nawe. Amen.

<sup>202</sup> Vano, muhan'ola va, kookupali (onoomalaru ovenxa ntata) wira mmalapo voomalela wa miyo. Miyo nkinimusuwela. Khino okathi ahu woopacerya okhala owaattamana siisa vamosa, 'voohikhala wira nirowira nipuro nlo mphironi nipuro nlo. Masi Muluku onnisisuwela hiyo oowanli. Vano vakhala . . .

<sup>203</sup> Vano nwehe, apatthani. Va eri elatarato olelo ya Yohani Oowaarya 4, muthiyana ni mulopwana ankumana emaara yoopacerya; Yesu ni muthiyana a oSamariya. Vano, miyo nkihiyo ka Yesu, nnakhala ola kahiyo muthiyana a oSamariya, masi ola okathi mukina. Eroho Awe yeeyo eri vaava. Muthiyana eemenle va, owo pooti okhala oowuulumela, owo pooti okhala muKristu, owo pooti ory'ene namawoka, owo pooti atthunaka musurukhu, owo pooti okhala eemenle-ene mwaha wa mutthu mukina. Nkisuwenle. Nkaakhanle wooleelani. Masi Muluku onnisisuwela. Vano vakhala wira Owo onovenya khukileela, ni omuhiya owo okhala mphuki, Owo akileela vale, oratteene, etthu ya yoola! Vakhala wira miyo . . . yookhala etthu mwaha wa yoola, nkaarowa osuwela. Masi Owo akileela vale etthu mwaha wa yoola, owo akhale ti mphuki.

<sup>204</sup> Vano, ahe, yakhala yoolikana, moosuwela wira ehaana orwa okhuma mwa enamuna emosa ya owerya. Eyo ekeekhai? Akina . . . Ahe, nto mwaarowa wiihana sayi Owerya iwo? Ti olaleerya Ehapari yooreera, olopolo mwaha wa Yesu Kristu, owiihana anatampi orwa waltaari, waavoniha aretta ni ooriipiwa murima, muthinto xeeni wa Eroho, muthinto xeeni wa mihokorokho Eroho eyo yaarow'aya okumiheryaka? Muthinto mmosaru wa mihokorokho Yesu Kristu aakumiheryawe, ni Eroho ya Muluku mwa Yoowo. Eyo ekeekhai? Yaarowa okhala Eroho y'Ekristu. Vekeekhai, waarowa okhala wawinyu othanla, evixa.

<sup>205</sup> Masi aarowa okhala Muluku wa nyuwo, khaarowa? [Muthiyaw'owo oniira, “Ayo, yaamukhala.”—Mol.] Ayo. Okhala wira, owo muKristu.

<sup>206</sup> Vano, kisuwenle sayi wira muKristu? Okhala wira kirimoona Eroho awe, moone, naanaano va, vekeekhai ntoko otthimaka wa murima okelaka, ntoko wiiraka, phyu, phyu, phyu. Ni

koosuwela wira Eroho ya Muluku eri mwa miyo, enikireerihale vano, ennisuwela wira ole ti munn'aka. Ni nkinatoko omoona, nave koosuwela wira ti yoowo. Moone, vekeekhai eri ntoko etthu enoorwa sa. Enrowa vamosa. Eroho awe enootakanxeya ni Eroho ekireerihale.

<sup>207</sup> Akavi yoonale eletarato ya Nlaikha n'Apwiya? Awo aakhalana, oh, awo aakhalana nno mapuro othene, iyo siri mulaponi mothene. Muupuwele, kinooleelani ila. Nlaikha nle n'Apwiya munoon'anyu valataratoni, Nlumi na Mooro naahonle aana a Isarayeli, naaipanke erutthu khukhala ni hiyo, naakhumme wa Muluku khurowa wa Muluku, ninnithika mahiku ookiserya wira nivare miteko Saya, nimaliherye Omwene, nri vaava va muhina mwa isentiimeturu muloko ni thanu va nipuro keemenly'aka. Vano muupuwele yeeyo. Mutharamulo xeeni! Masi kinnaamini Nenlo. Nlo ninnisuwela. Koosuwela wira Nlo khaninvonya.

Vano Apwiya yakuupululela etthu emosa ya nyuwo, munna.

<sup>208</sup> Ni wa nyuwo muliinyani mwa mavekelo, vano mukhale oolikana paahi, 'okhala wira nkinthuna omaala mwaha wa othokorerya wa yothene eyo, 'okhala wira. . . Nkaakhanle wira. Masi mukhale oolikana paahi, mukhale mwaaminiki.

<sup>209</sup> Vano, vaakhanle wira kaaniwerya wookhaliheryani, vano kuhinaira, weso kaamukhala ootakhala, nkaakhanle weemelaka va vapulpitu ila; mutthu a enamuna yeeyo, vekeekhai nnari. Masi nkireere olaleya voowiilipiha. Ni kinlipelela okathi vakhani paahi, wira kikhalane nvaanelo ni nyuwo.

<sup>210</sup> Siiso ntoko Apwiya'ahu yaamwiireny'aya muthiyana veehimeni, Awo yiirale, "Mukiruuhele maasi kiwurye." Munnona? Awo yiira exeeni? Yaavara erooho awe, moone ele—ele yaari mwaha ene. Vano Awo vaphwanyaly'aya mulattu awe, Awo yaahimuleela exeeni yaari mulattu awe. Munnuupuwele yaari exeeni? Owo aarina axiia athanu; ni athanu na mmosa, yaari, 'okhala wira aahikhalana athanu ni ole aakhalan'awe nto yaakhala axiia athanu na mosa.

<sup>211</sup> Nto—nto okathi Awo amuhimenry'aya vatthu vaari mulattu awe, vano, owo iirale, "Napwiya, kinoona wira Nyuwo mwa profeta."

<sup>212</sup> Moone, a—a—afarisi yaammalaru ohimya wira, "Owo aari nahako, xetwani." Owo khwaaleela wira eyo yaamuleveliliwa okathi ule. Masi Eroho Yowarwa yarwa vale, wira siiso, khiyaakhalakhala eleleveliwaka, olavula voovirikanya Yeeyo.

<sup>213</sup> Tivo, masi owo iirale, "Kinoona wira Nyuwo mwa profeta. Ni hiyo noosuwela (hiyo aSamariya, ninnisuwela Masu), noosuwela wira Mesiya arwa vale, Yoowo onihaniwa Kristu, onoonileela ithu iya sothene." Moone, owo aanisuwela wira ele yaari ethoonyeryo ya Mesiya.

Nto Owo khwira, “Miyo ka Yoowo kinlavula ni nyuwo.”

214 Vano owo aahihiya muno, khutthimakela opooma, khwira, “Murwe, mmoone Mulopwana mmosa Yoowo okihimenrye itthu kiiraly’aka. Kahi yoola Mesiya?”

215 Vano, vakhala wira ele yaari ethoonyeryo ya Mesiya okathi ule, yaamukhala ethoonyeryo ya Mesiya vano, vakhala wira Mesiya mmosaru nsana, olelo, ni mahiku othene. Vakhala wira Eroho ela ya . . .

216 Nyuwo munnisuwela, wira etthu enimwiiraneya, khamunsuwela? Vano muthukumano osuwele. Moonelo mmosa, woomaaleleya ni wowiiyeviha omanle okhala, ori mwa nyuwo. Kahi ekeekhai? [Muthiyan’owo, oniira, “Ti yeeyo.”—Mol.] Nvenxe ntata. Omaaleleya, wowiiyeviha. Kinweha Waarya ori eriyari ya miyo ni muthiyan’ola. Vano onoomwareya.

217 Muthiyana onihaaxeya ni elapaha. [Muthiyan’owo oniira, “Mookhalana exariya.”—Mol.] Ni owo onoomalaru orwa akhumaka oxipiritaali w’elapaha. [“Oh, oh, oh!”] Eyo ekeekhai. [“Vaareera.”] Ookhala mutthu mukina. Ti mmirav’ola va. Minuutu mmosa paahi. Eroho yeeyo eri mwa yoowo. Ahe, owo ti musulu anyu. [“Ayo, ti yoowo. Vaareera.”] Vaareera. Owo orina mukattyamiho wa nikhusaku. Owo nave-tho orina murala vansasuni vawe. Eyo ekeekhai. [“Eyo ekeekhai. Ekeekhai voomalela.”] Eyo ekeekhai, kehiyo? [“Eyo ekeekhai. Ti yeeyo. Mameetiku ahimale wira aahikhalana.”] Vekeekhai. Vaareera. Muhano Harris, nlo ti nsina nanyu. [“Nlo ti nsina naka!”] Nyuwo ni musulu anyu murowaseke owaani, mikattyamiho nanyu soomala. Yesu Kristu onnookhalihani . . .? . . .

218 Munnimwaamini Pwiya Yesu vano? Moone, owo Bibiliaa, eyo Eroho ya Muluku eniira vamosaru nsana, olelo, ni mahiku othene. Vano munnaamini ni murima wothene? Eyo yaammaliha mwaha.

219 Vano kaahihimye hata nuulumo, owiixaatherani matata paahi Mureeriho ory’ene vaava, mwaamwaamini? Rowakani nto, ni nvonihwe, mwa Nsina na Yesu Kristu.

220 Murwe, munna. Munnitthuna woomalani mukattyamiho anyu wa mmirimani? Rowakani paahi, mmuxukhuruku Muluku, ni mwiire, “Woomala,” mwaamini ni murima wothene.

221 Kawiixaatherani matata, munnaamini wira Muluku onimoovonihani? Mwa Nsina na Yesu, nvonihwe. Owo ti mwiirelo w’okela. Owo oovonihwa. Vaareera. Owo ti mwiirelo. Vano, muupuwele, Eroho Yowarya eri vaava.

222 Va onoorwa mwammiravo mmosa oophenteya. Khamureere oyeva, oophentiwa, voorika, okhalana waamini. Masi nkawehani va minuutu mmosa paahi, wa Munna Branham. Vaareera. Mukattyamiho anyu wa murima woomala vano. Muroweke owaani mukhale mukumi. Amen. Yesu onnookhalihani saana.

223 Nrowe niire, “Kooxukhuru Pwiya,” mwaha wa mwammirav’ole.

224 Munimuukhuleyaka vanci-ene, kahi siiso? Onrowa woohiyani vano. Murowe owaani paahi, mwiiraka, “Kooxukhuru Pwiya,” ni mukhale mukumi.

225 Murwe. Ahe, tiyapeeti uwo a khalayi, vaakhanle wira naamuwerya omukumiha! Munnaamini ni murima wothene? Mwa Nsina na Yesu, omuhiye muthiya’ola ni ohimuhaaxe-tho. Amen.

226 Murwe vano. Muhan’ola aarina etthu yeeyo, tiyapeti, nave. Mwaamini ni murima wothene vano mwaaviraka vale, ni mukhale mukumi, mwa Nsina n’Apwiya Yesu.

Munnaamini, atthu othene vano? Mmwaamini Muluku!

227 Murwe, murokor’aka. Mwa Nsina na Yesu Kristu, mukhale mukumi. Mukhalane waamini, muhihoverye.

228 Murwe, munna oophentiwa. Vekeekhai kinnaamini wira moovonihiwa mukilante-ene vaavale vale, tivo muroweke paahi! . . . ? . . . Muluku ooreeriheni vano. Vareera.

229 Murwe, munna oophentiwa. Mmwaamini Muluku! Ti yeeyo. Ti yeeyo. Mwa Nsina na Yesu Kristu, mukhale mukumi. Amen. Muluku ooreeriheni, munna. Muroweke, mutthapaka ni mwaaminiki. Oh, owo ti mwiirelo w’orwa-no.

230 Vano mukhale oottittimiha saana, atthu othene mukhalane ikhatera sanyu vano. Mukhale oottittimiha saana, Eroho Yowarya eri vaava. Okhala wira Eyo khenlavula vanci-ene wa awo; imaara sikina ennihimya itthu paahi. Miyo kineeserya ohimya paahi. . . Nto koonaru orwa voowaakuva, kinoohimya n’ukelela ohoolo. Munnona? Imaara sikina kinoowerya wiihuluxa minuutu vakhani paahi, vano nto n’ukelela ohoolo. Masi Eroho Yowarya eri vaava, Eyo nlelo ennisuwela itthu sothene.

231 Munnaamini yeeyo, muhano? Mukaattamele. Kookupali wira, nyuwo mury’ene muSpaanya, ni miyo mwIrlanta, khaninsuwelana mmosa ni mukhw’awe. [Muthiyan’owo oniira, “Nnari.”—Mol.] Ela emaara yoopacerya wahu okumana. Munnaamini wira Yesu Kristu, Ola onimuhimy’aka, ti Mwaana a Muluku eekeekhai? Munnaamini wira kinnimuthoonerya Yoowo oratteene? Munnaamini wira rookiruma wira kookhaliheryeni? [“Ayo.”] Kooleelani vale ole okhanle mukattyamiho anyu, munoomwaamini? Mukattyamiho anyu ori vamuthanani vanyu. Murina mukattyamiho wa muthana. Nave-tho, aiy’anyu arina mukattyamiho wa muthana. Awo aakhalana mukattyamiho wa mwetto. Mookhalana mwaaruusi orina mukattyamiho w’exiko. Owo otannyeiye ni ehasara ya mukukutta. Ti yeeyo. [“Oh, kooxukhuru, Pwiya!”] Muroweke owaani, othene munoorowa okhala saana.



232 Mwaamini. Muhihoverye. Vano eyo ennitteettheiha ni enniira etthu. Mwaamini paahi vano, mwaamini.

Mwa Nsina na Yesu, kinninkelela muthiyan'owo. Amen.

233 Murwe vano. Murwe, mulopwana. Muhihoverye vano. Munikhalaka oowuukhuleya saana ni eettetemeri, ni ninookhalihani nikhwatta na murupela munipwiipwini, ni ninnoowereyani. Masi rowakani owaani vano, munoorowa okhala mukumi ni munookhala saana. Muluku ooreeriheni. Mwaamini vano. Mwaamini ni murima wothene.

234 Ahe, ninniweriya woona exeeni okhanle mukattyamiho wa mwanamwan'owo, ookhalana ikaruma sawe va. Munrowa waamini mwaha wa yoowo, munna, vano, [Munna muthiyana oniira, "Ayo, kinnaamini."—Mol.], wira Muluku onoorowa omuthuniherya mwanamwan'owo okhala mukumi, ni ovenya khukhala mwamuthiyana mmosa ooreera ahirina ikaruma iya?

235 Tithi a Wirimu oophenteya, vaakhanle wira kaaniweriya onvonihani mwaan'ola n'ukumiha ikaruma iya wa yoowo, kaamwiira. Masi kinimwaaxaatherya ntata naka mwanamwan'ola oophenteya, ohirina enamuna yo waamini mmansawe. Miyo kinnipwapwela mukhale'ola wo orakala. Mwa Nsina na Yesu Kristu, mwaan'ola eette ni akhale mukumi. Vekeekhai vookupalixa ntoko seemenly'aka va. [Munna muthiyana oniira, "Oovonihwa."—Mol.] Vekeekhai. Ayo. Munnaamini, kahi siiso? ["Kinnaamini."] Akavi anaamini? Owo onoorowa, ni mwaana onoorula ikaruma, ni onimweetta. Vareera, mwaamini.

236 Ekurukuru mmirimani. Ni, oh, wulu! Munnaamini? Vano rowakani, mwalye ni muvirihe okathi wooreera, nto waamini wanyu ohoovonihani.

Mwaamini vano, atthu othene, mmwaamini Muluku! Murwe, munna oophentiwa. Munaamini ni murima wothene?

237 O Pwiya, kinvekela wira Nyuwo munvonihe. Owo ohaana okhalana owerya Wanyu wo ovoniha, ahiiso okhwa. Ni kinvekela wira Nyuwo munvonihe. Munvahe. Munvahe.

238 Vaareera, munna. Mukihiye kiwooniheni etthu. Aakhala atthu anci-ene vamuthukumanoni va, anihaaxeya ni etthu emosaru yeeyo munihaaxey'anyu. Moone, mukihiye kiwooniheni etthu. Murina murima wo wuukhuleya. Mukihiye kiwooniheni iwo. Othene ale anihaaxeya mwaha wo wuukhuleya (nvenxe matata) ni murima, nvenxe matata. Nkaaweheni, moone. Kaarowa owerya sayi omwiihana khula mmosa a yaawo? Munnona? Nkaawerya wira. Masi kinniwerya woona mwaataan'ole muulupale paahi; nwanani oneererya woovarani, ni nvekelaka vo omoreliwa ikharari. Owo onoorowa ohiya evarelelo awe mapuro othene. Eyo ekeekhaii. Tivo, munnaamini wira onoohiya, wira owo opweteiwa yeeyo wa nyuwo vano? [Munna muthiyana onookhuwela, "Ayo."—Mol.] Munnoona

voovirikana, khamonoona? Nvonihawe vaavale vene. Muroweke, mutthapaka, mwiire, “Kooxukhuru.”

<sup>239</sup> Murwe, mwamuthiyana, mwaamini ni murima wothene mukhalihawe mukumi. Mwa Nsina na Yesu, munn’ihu avonihawe.

<sup>240</sup> Muluku, mmureerihe mwamirav’ola ohiy’ula. Oh, wulu! Munnaamini wira Yesu onoorowa wookhalihani mukumi? Vaareera. Mwa Nsina na Yesu! Muluku ooreeriheni.

<sup>241</sup> Vaareera. Murwe vano, ni mwaamini, munna. Murwe, munn’aka, namukhora. Murwe, nyuwo, mwaakhele iparakhha s’Apwiya. Kinimwiixaatherya matata munn’aka, mwa Nsina na Yesu. Owo avonihawe. Munvahe.

<sup>242</sup> Atthu othene annaamini? Mwaamini. Muhihoverye. Mwaamini paahi vano. Okhala wira khanineemela ni khula mutthu paahi, eyo khenihimya wira... Ohimya paahi... Kinnoona, masi nkinthuna paahi wira yoowoona e... Ethu emosa ntoko enluttana mwa nyuwo mwaalavulaka n’atthu. Munnisuwela entthun’aka ohimya? Eyo enoolutta, vano nto nyuwo mu... Ti yeeyo, moone, nyuwo mu... Enookhalihani ooteettheya.

<sup>243</sup> Okathi vakhani paahi, yookhala ekhumelenle vamuthukumanoni. Mwaaminiru, khamunrowa-tho okhalana wooperariwa eyoso. Mookwannya ekerekhere ya nlaya Nawe, munna. Owo okwannyalé exeeni? Mukileele etthu okwannyalé’awe. Ti voohiweryaneya owo okikwannya miyo okhuma weiwe. Masi owo paahi... Vano mukihaye kooleleni etthu. Owo aakilanthé vaavale vale nto, avekelaka, “Muluku, mmuhiye akiihane.” Eyo yakhala ekeekhai, nlo nakhala ti nivekelo nanyu... Eyo vo, moone. Eyo ekeekhai. Mwiire siiso, moone yaahikhale siiso. Mwiire siiso tu. Vaareera.

<sup>244</sup> Hiyo n’amalapo mmosa ni mukhw’awe. Nkinoosuwelani, ni nyuwo khamunkisuwela. Muluku onnisisuwela oowanli. Mureeriho ory’ene vaava, ninrowa woona paahi ole okhanle mukattyamiho. Ethu yoopacerya, munihaaxeya maitho anyu, muru anyu. Murina ephutu moono woothiyana ni munresani. [Muthiyan’owo oniira, “Ti yeeyo.”—Mol.] Ti yeeyo. Munnaamini? [“Ayo.”] Nyuwo mwa a nipuro nimosa nniihaniwa Sunnyvale. [“Ti yeeyo.”] Muhano White. [“Ayo.”] Muroweke owaani, mutthapaka, mukhale mukumi. Vaareera.

<sup>245</sup> Mmwaamini Muluku, mwaamini paahi vano, atthu othene. Murwe vano ni mukhale... Munnaamini? Atthu othene anoovekela? Oh, mukhale ohoolo wa Muluku paahi, nvekelaka!

Murwe, munna. Mwa Nsina na Yesu, mukhale mukumi.

<sup>246</sup> Murwe, munna oophentiwa. Murwe, mwaaminiki ni sothene siri mwa nyuwo. O Pwiya, mwa Nsina na Yesu, munvonihe munn’aka. Amen.

247 Murwe, munna oophentiwa, mwaamini paahi ele Muluku onir'awe, Ohoolo Wawe. Munvira vathi va mwiikimanyo vano. Mwa Nsina na Yesu, ola avonihiwe.

248 Murwe, munna, muviraka vathi va mwiikimanyo, mwaaminiki ni murima wothene. Mukattyamiho wa muthana onookhuma, nto muroweke owaani mukhale mukumi. Vaareera. Mwa Nsina na Yesu Kristu!

249 Murwe, munna oophentiwa. O Pwiya, kinvekela, okathi owo onivir'awe, wira Nyuwo munvonihe. Amen.

250 Murwe, munna. Mwaamini vano. Arumeyi, nvekele. Athu othene evekele. Murwe. Mwa Nsina na Yesu, ola avonihiwe. Amen.

251 Murwe vano, mwaamini ni murima wothene. Munna oowooniha othunku, khoreere owereiwa. Munnaamini wira Muluku onnisuwela etthu evonyeie ni nyuwo? Munnaamini wira Owo onniwerya okileela? Vano mukattyamiho w'othiyana onoomala. Muroweke owaani mukhale mukumi.

252 Murwe, mwaaminiki. Vaareera, munna oophentiwa, rwaakani. Munnaamini ni murima wothene? Munuupuwela wira moovonihiwa okathi ovire okathi naavekelenly'ahu ale yaarina mukattyamiho wa murima vale? Munnaamini? Muroweke, mukhalihawe mukumi, ni mwaamini ni murima wothene.

253 Nrowe niire, "Attotopeliwe Apwiya," athu othene. Mmwaamini Muluku.

254 Murwe, munn'aka. Mwa Nsina n'Apwiya Yesu, avonihiwe. Amen.

255 Kahi yooreerexa? Owo kahi oothamaleya? Khivanxankiha Owo iihaniw'awe "Namiruku, Mwene a Murettele, Muluku a Ikuru, Tithi a Mahiku othene"!

256 Mwaavekelek oophentiwa anyu. Nvekele paahi (kahi mmansinyu) ale oophentiwa anyu okathi vakhani paahi. Munvekelele mutthu.

257 Muhano, munnaamini? Munnaamini wira Muluku onniwerya okileela etthu mweemelenly'anyu vo? Kinnoona wira mookhalana e. . . Oh, nyuwo mwa mmosa a anamuteko? Miyo nkinoosuwelani. Miyo—miyo kinoona wira nkinatoko owoonani voohikhala ota iwe vamuthukumanoni. Eyo ekeekhai? Vano muthukumano onoosuwela. Ti yeeyo. Munnaamini wira Kristu onniwerya okuupululela ele ekhanle mukattyamiho anyu? [Muhan'owo oniira, "Amen."—Mol.] Vano Owo aira vale, nto. . . Ayo, okhalaka wira owo owanre nniya nle, siiso ory'ene mutthu va ni wira, "Ahe, vekeekhai, owo namuteko, owo onnimusuwela." Nkinatoko woosuwelani kookhalaru, nkinsuwela hat'etthu. Masi kooleelani vatthu vari mukattyamiho anyu, ni etthu, moosuwela wira ehaana okhala etthu yoohikhala miyo kiniira. Eyo ekeekhai? ["Ti yeeyo."] Khamukhanle va

mwaha wa nyuwaano. ["Nnari."] Muri va mwaha wa mwan'inyu. Ti yeeyo. Nto yookhala etthu evonyeiye ni mitika sawe. Etthu ntoko ohononeya mitika. Eyo yoomukhaliha mukhalelo mmosa, maitho awe aavirikana, ni sothene, oowuukhuleya saana. Nsina nawe ti Donald. ["Ayo!"] Muroweke owaani, ni mwaamini, owo akhale mukumi. Mukuxe nleeso nlo . . . ? . . .

258 Mmwaamini Muluku. Muhihoverye. Murwe, munna. Murwe, mwaaminiki. Vano nrowe nivekele, atthu othene ekhale evekelaka. Murwe, munna. Muluku, mwa Nsina na Yesu Kristu, munn'aka avonihwe.

259 Murwe vano, munna oophentiwa. Ti yeeyo, murwe. O Pwiya, okathi onvir'awe vathi va mwiikimanyo wa Kristu, Ephome ekwanye erutthu awe.

260 Murwe, munn'aka oophentiwa, mwaamini mwaha wa mwaamukhaani. Nto, Pwiya, okathi awo anviras'aya vathi va mwiikimanyo, miyo kinniwiixaatherya mata'aka ni ovekela ovonihwa waya, mwa Nsina na Yesu.

261 Murwe, munn'aka, movire vathi va mwiikimanyo, mwaaminiki ni murima wothene. Munooverya okhalana ele envekel'anyu. Mwa Nsina na Yesu Kristu, owo avonihwe. Amen.

262 Murwe, munna, siiso, murowe vathi va mwiikimanyo, mwaaminiki. Mwa Nsina na Yesu Kristu, munivahe. Ti yeeyo.

263 Murwe, munn'aka. Mmwaamini Muluku. Muhihoverye. Mwaamini. Mwa Nsina na Yesu Kristu, kinvekela wira yoovekela awe evaheriwe. Amen.

264 Nvekele, axinna. Atthu othene evekele, mapuro othene. Vaareera. Mwa Nsina na Yesu Kristu, munn'aka akhalihwe mukumi.

265 Murwe, munna. Mwa Nsina na Yesu Kristu, owo akhalihwe mukumi. Amen. Murwe, mutthu ti mutthu onvekela, axilopwana kamosa-kamosa ota iwo, mukhale nvekelaka.

Mwa Nsina na Yesu Kristu, owo avonihwe. Mmwaamini Muluku.

Murwe, munna. Mwaamini vano, ni murima wothene. Mwa Nsina na Yesu, mukhalihwe mukumi.

Murwe, munn'aka. Munnaamini? Mulopwana mmosa, muulupale a ikuru, masi nnakhala vo, mukattyamiho wa mmirimani. Mwaamini ni murima wothene, muroweke owaani, mukhale mukumi mwa Nsina n'Apwiya Yesu. Vaareera, mulopwana.

Munnaamini, mwamunna? Vaareera, murwe wa miyo va. Mwa Nsina n'Apwiya Yesu yoovekel'awe evaheriwe.

Mwaamini, munn'aka, ni sothene siri mwa nyuwo. Mwa Nsina na Yesu Kristu, yoovekela anyu evaheriwe. Muhihoverye; rowakani, munniwerya woona . . . ? . . . Murwe.

Muluku ooreeriheni. Kooxukhuru mulopwana...?...  
Vaareera, ti siiso?

Munnaamini ni murima wothene? Muluku ooreeriheni,  
mmiravo. Mwa Nsina na Yesu mukhalihawe mukumi.

Murwe, munna. Ela ti emalelo ya ittikitti sa mavekelo?  
Ittikitti sa mavekelo sothene soomala? Ehaali anyu? Munnaamini  
wira ka murumeyi Awe? Munnaamini. Munnaamini nto  
wira Owo onniwerya okileela sothene sa mukattyamiho  
anyu? Vaareera. Vano, kookupali wira munoohimyaruru wira  
munookhumaru oxipiritaali. Emosa wa itthu sivonyeiye ni  
nyuwo, muroorakala eyuunu, mukattyamiho muyuununi  
mw'anyu. Masi musuwelelo anyu w'oxipiritaali waari wa  
operasawu wa othiyana; nlelo khovonne. Eyo ekeekhai, kahi  
siiso? Ni nsina nanyu mwa muhano Potts. Muroweke owaani  
mukhale mukumi vano...?...

<sup>266</sup> Munnaamini ni murima wothene? Mwaamini.  
Mulopwan'owo okilante ottuli iwo ti yoowo kinkhal'aka  
kimoona. Owo onoovekela...Owo owanre ekamisa  
yootteela, yootthukuwa vamukalani, oninkelela mpatthani  
awe okilante vakhiviru ni yoowo vo orina mukhalelo  
w'opahuwa. Munnaamini, mulopwana? Nvenye mweemele  
mwaakhele. Mmwiixaatherye matata mpatthan'inyu vo. Eyo  
vo. Muluku ooreeriheni. Muroweke owaani ni mukhale mukumi,  
mwan'aka. Yesu Kristu onnookhalihani mukumi. Aleluya. Owo  
aamuvekelela mpatthani awe. Ti yeeyo eniira. Yesu Kristu,  
Mwaana a Muluku onniira itthu iya, onnookhalihani saana.  
Munnaamini yeeyo?

Va ori muthiyana mmosa okilante vaava va orina etthu  
yaamukhaani yootteela enrukurerya muru awe, okilante  
vakhiviru ni mwaaruusi mmosa orina etthu emosa yooripelela  
mukhararini mw'awe. Muthiyani'owo onaavekelela aiy'awe. Ti  
yeeyo. Awo jaarina kankuru, nto nyuwo munoova waatthikela-  
tho. Eyo ekeekhai, kahi yeeyo? Vaareera. Munnaamini? Nvenye  
mweemele nto, mwaakhele Yeeyo. Mwa Nsina na Yesu Kristu,  
omukhume.

<sup>267</sup> Munvekelele mutthu. Munvekelele mpatthani. Munvekelele  
mutthu. Va, ottuli iwo, kinnimoona mulopwana mmosa  
okilante ottuli wa muthiyani'ola va, ottuli vakhani, okilante,  
anenli okilante vo, owo onaavekelela amwaar'awe. Awo  
arimuukhuleya khuvolola. Munnaamini, mulopwana? Vaareera,  
nvenye mweemele ni mwaakhele ovonihiwa, ni mwaamini ni  
murima wothene. Muroweke owaani mwaaphwanye epenuwaka.  
Muluku ooreeriheni, munn'aka oophentiwa. Mwaamini ni  
sothene siri mwa nyuwo.

Ookhala mutthu mukina onaamini? Mmwaamini Muluku.  
Va, mwaaruusi mwaamukhaani' ovenxale ntata nawe va. Vale  
ori Waarya wiithomeiye vasulu vawe. Oh, owo ti...Va ori

mukhaani. . . Aakhala aili a yaawo. Mwaamuthiyana ovenxale ntata. Mwaamuthiyana okilanthe vakhiviru ni yoowo, onkhala ntoko Waarya wiithomeiye vasulu va mwaamuthiyana owanre evistiitu ntoko yooripelela. Muninkelela mutthu: musulu, orina mukattiyamiho wa murima, wuukhuleya. Ti yeeyo, kahiyo? Owo khokhanle vaava. Ori oLos Angeles. Owo ti muhim'anyu, mwaha ekhalenly'aya yowaattamexa. Owo onoovekela nave, masi ti wa mpatthani. Owo onvekela orukunxa murima wa mpatthani awe ola. Mpatthani ula muKatolika, nto owo oninkelela yoowo. Ti yeeyo. Nyuwo oowanli mwa axinna. Eyo yakhala ekeekhai, nvenye mweemele. Muluku ooreeriheni. Miyo nkinoosuwelani, nkinatoko owoonani kookhalaru. Yookhala etthu yootikiniha ya nyuwo nnakhala vo. Nyuwo mwaari nipuro nlo nave, ahiiso—ahiiso munnimusuwela mutthu a nipuro nimosa kaary'aka. Kinnoona nipuro nimosa ntoko nootikiniha. Khanihiyo—khanihiyo hata. . . Ti wAlemaanya. Nyuwo mwa a wAlemaanya? Ti yeeyo. Mwa yoowo. Eyo ekeekhai volikana. Vaareera, waamini wanyu ohoovahani yoovekela anyu. Muroweke owaani. Munoochwanya siiso mwaaminni anyu. Aleluya.

<sup>268</sup> Miyo kinnootharimulani, mwa Nsina na Yesu Kristu, wira mwaamini wira Eyo ekeekhai. Miyo kino. . . Moota. . . Ookhala natampi va aatthuna orwa va ni weemela nihinatthi okelela ohoolo ni eliinya ya mavekelo? Mpatthani natampi, nyuwo mutthikenle ottuli, mwaanitthuna omusuwela Pwiya Yesu ntoko Moopoli anyu yeenyu? Murwe va minuutu mmosa paahi okathi orkawu onnirumihel'awe wiiana mwaamukhaani wa waltaari. Murwe va. Eroho Yowarya ennisuwela nyuwo mw'ani. Mwaamutthunaka Kristu naanaano va mmakhaleloni mw'anyu, munnitthuna orwa okathi ene yoola paahi weemela waltaari nno? Ola pooti okhala okathi wookiserya wa miyo otoko ophiyererya ovekela ni nyuwo mahiku othene a ekumi ahu. Ola p'ukathi anyu. Muluku ooreeriheni, mwaapara mwaamukhaani.

Munnitthuna orwa? Mutthu mukina-tho? Mulopwan'ola onoorwa va. Mutthu mukina-tho? Murwe voowaakuva ottuli wa munlaano iwo, nto murwe waltaari vano, nilipelelaka okathi vakhani paahi. Ninrowa olipelela. Murwe nno, mulopwana, mweemele va.

Ookhala mutthu mukina aatthuna orwa weemela ni yoowo? Mukhume. Murwe naanaano va mweemele va, wira noovekeleleni. Kinootteeliwa murima. Kinootteeliwa murima vanci-ene ovekela ni nyuwo. Murwe paahi. Ti yeeyo tu enoovekel'ahuni wira.

Muluku ooreeriheni, mulopwana, mweemele vaava va. Ookhala mukina?

<sup>269</sup> Yookhala ephattuvelo yoosareya Ephome ekumihiwe mmutikani mwa Emanuweli, vaavo anatampi ampwin'aya vathi

moohuruwelani annaapweteya malepa aya othene oottheka. Muluku ori mutuniyani mw'Awe? Muluku mwa Masu Awe? Muluku mwa Mwan'Awe? Vano, Muluku ori mw'atthu Awe? Ahe, Muluku ori vaava weso. Owo ontthuna orwa mwa nyuwo. Khamunthuna orwa?

Yookhala ephattuwelo yoosareya ephome,  
Enikumihiwa . . . ? . . .

Annaapweteya malepa aya othene oottheka.

Munnitthuna orwa naanaano va, nyuwo munimphavela Kristu? Khanincala ekereja xeeni muniir'anyu mpannta, wala t'evi onrow'anyu-wo, wala t'evi onrow'anyu orowa-wo. Murwe. Ti yeeyo. Murowe mpakha waltaari naanaano. Nyuwo muhirina Eroho Yowarya, munnitthuna orwa? Murwe naanaano va niipaka. Murwe.

Nto okathi anatampi anipwin'aya vathi  
moohuruwelani,  
Annaapweteya othene . . .

Muluku ooreeriheni, oophentiwa. Kookhalana Sarah mwaamukhaani owaani oowunnuwa ntoko nyuwo. Munnoona yeeyo, mama?

Annaapweteya malepa aya othene oottheka.

Muluku ooreeriheni, munna. Mookupalihiwa wira Kristu ori mw'atthu Awe? Rwaakani vano, khamunthuna? Nvenye murwaaka. Murwe epant'ila.

Nto okathi anatampi anipwin'aya vathi  
mohuruwelani,  
Annaapweteya malepa aya othene oottheka.  
Nawiiye ooluwela aahitthapa woona  
Ephattuwelo ele nihiku nawe; (Kristu  
oovaheriwa wa nyuwo, mpatthani.  
Munnitthuna orwa omwaakhela Yoowo?)

. . .kino, nnya (Muluku ooreeriheni. Ti  
yooreera. Mweette mpakha . . .)

Orapiha itampi saka sothene.

Orapiha itampi saka sothene,

Orapiha itampi saka sothene;

Nto vaavale miyo, nnya ootakhala ntoko  
yoowo,

Kinoorapiha itampi saka sothene.

<sup>270</sup> Siiso kinookupali wira khaavo matata eephome nihiku n'olamuliwa anrowa okuuvela yiraka, "Mwaahaana owehererya-tho vakhani," miyo kininvekela ni kinimulattula khula mutthu ohirina Kristu, ohirina nrromelo, ohirina Eroho Yowarya, mwa Nsina na Yesu Kristu, kinoolattulani nno orwa waltaari va. Murwe mmwaakhele Yoowo naanaano. Masi mwaahirwe, weso nkinrowa okhala mulipa-oowaakhula nihiku

n'olamuliwa. Moone yeeyo vano, Kristu ory'ene eriyari ahu. Hiyo noosuwela yeeyo.

Muluku ori mutuniyani mw'Awe. Nyuwo munnimoona Yoowo ota iwo. Muluku ori mwa Masu Awe. Munnimoona Yoowo va. Muluku ori mwa Mwan'Awe. Munnimoona Yoowo vamwiikimanyo. Muluku ori mw'atthu Awe. Munnoona Yeeyo va yeetteetaka, evaraka muteko, Eyo eri vaava.

Vano, nrowe nirwe niipaka emaaara emosa-tho, "Yookhala Ephattuwelo yoosareya Ephome." Khamuntthuna orwa?

Yookhala ephattuwelo yoosareya Ephome,  
 (Va eri ephattuwelo. Va vamwiikimanyo.  
 Khamuntthuna orwa?)  
 . . .Mmutikani mwa Emanuweli,  
 Nto anatampi yapwina vathi mohuruwelani,  
 Anaapweteya malepa aya othene oottheke.  
 (Muluku ooreeriheni.)  
 . . .malepa aya othene oottheke,  
 Annaapweteya malepa aya othene oottheke;  
 Nto anatampi aapwina vathi mohuruwelani  
 memmo,  
 Annaapweteya malepa aya othene oottheke.

<sup>271</sup> Mukhale murwaaka paahi. Ti yeeyo. Mukhale murwaaka. Hiyo ninookhala nilipelelaka. Nookhalana okathi munci-ene wira naalipelele atthu oolapa wira erwe waltaari. Murweeke. Hiyo nootteeleliwa murima, ninnitthapa, ninnimuxukhuru Muluku nyuwo orwa. Rowakani naanano va Ohoolo wa Eroho Yowarya, Yoowo okhanle ookhala mapuro othene, oowerya sothene, oohimala. Munnitthuna orwa naanaano wa Yoowo mahala Awe ekhumaka voophiyerya wira awoopole othene, wira yoovaheni sothene mumphavel'anyu. Owo ori vaava wira oovaheni Eroho Yowarya, oopole ekumi anyu, oovoniheni khula eretta, owiirelani etthu p'itthu mumphavel'anyu. Apwiya yooreeriheni.

<sup>272</sup> Vano, muthukumano ovekelaka, vooamaaleleya, kinrowa olavula n'ale ari va. Apatthani, yookhala Etthu yoohimenryeni orwa waltaari va. Aari Yoole onsuwela murim'anyu, Yoole onlavula va, Eroho Yowarya, Muluku. Muluku ti Eroho Yowarya mw'atthu Awe, aataanihaka olumwenku ni Yoowo.

Vano, Owo onrweela owaataanihani nyuwo ni Yoowo mwaneene. Ooreeriwa ti nyuwo. Ooreeriwa maitho atthukunwe wira yoone Omwene wa Muluku. Yaahikala ikonto sinci-ene y'atthu anyu nyuwo muhinatthi, imiya imiya sene w'axipwaapu anyu, yaaphavela woona mahiku ala. Atthu anci-ene aalupale hiyo nihinatthi, atthu aalupale anci-ene nyuwo muhinatthi yaahiphavela woona okathi Eroho Yowarya yaarow'aya orwa mukereja wira etthu moonaly'anyu wiiriwa oxekuw'ola. Awo



akhwiye moowaamini, yaaminiki wira nihiku nimos a an'aya yaamurowa wona.

Vano, nyuwo muhona oxekuw'ola. Muhiiwa Masu. Moosuwela wira Eyo ekeekhai. Ni Muluku ootthukula maitho anyu; mavekelo aya.

<sup>273</sup> Va arisa axinamwane athiyana yeemelanse va, mai mmosa eemenle, aavarenle axinamwane aili athiyana. Axikhaani murwe, munlaka. Kaatthuna kisuwele sinto mwanamwane, anamwane, imaara sikina khanaapwapwela aalweene, mmurimani mwaya mwaamukhaani wootteethya. Awo khahulunwe inamuna sothene sa othepiwa wa molumwenkuni ni itthu. Ti wootteethya ni woosivela. Kinaaweha axinamwane ala aili axithiyana amupatikhale muhano, ntoko wira yaawehererya etthu wiiraneya. Vekeekhai, Muluku onnilavula n'ana Awe axikhaani. Bibilia ohimye siiso. "Mwahiye anamwane ekirweeleke Miyo. Muhaakhoottiheryeke."

Kinnimoona mai mmosa mwaamukhaani va omuvarenle mwan'awe, mwaana mmosa oosivela, omuvarenle mmoononi mwawe. Owo ohoorwa va vano wira aataanihiwe ni Kristu. Vano, ooreeriwa ti nyuwo. "Khaavo onwerya orwa wa Miyo . . ."

Mwaamulopwana mmosa onvarenle mwaar'awe, wona waka, eemenle vale omuvarenle-ene. Owo onimunla. Owo ohuuramiha muru mwa nttittimiho. Moosuwela wira iyo miteko sa Eroho Yowarya? Akina, mwanamwane mwamuthiyana a maitho ookhwila onikiweha orina iyaakha soophiyaka thanu na piili wala thanu na tthaaru, maitho ookhwila ni maihi ookhwila, wiitho wawe wothene ti wowaarya-wo. Onwehererya etthu. Siiso okhanle-ene muSpaanya.

<sup>274</sup> Kinnimoona mwaamuthiyana mmosa oophenteya, ori wookumanani wa ekumi uuramme muru mwa nttittimiho, miyoono sawe sookhuniwa. Kinniwoona akina, maihi oottweelela, yuuraminhe-ene miru. Ola okathi wooreerihiwa.

Muupuwele, apatthani, hiyo khinnarweeke osulu nno orwa paahi. Nirwiiye mwaha wo wira Muluku oroowiihanani. Nyuwo mwa itthuvo sa muthukuman'ola oxekuw'ola. Voohithepya, nyuwo mwa itthuvo sa mahala a Yesu Kristu, wira Owo oowiihanani wira mwaataanihiwe ni orwa omwaakhela Yoowo oxekuw'ola. Muluku akhale ni nyuwo.

"Ooreeriwa t'ale (Munnona?) anvoliwa etala ni ntthona mwaha w'exariya. Awo anoovona." Enniphwanyaneya yeeyo Mooreeriwani. Yesu ohimye siiso.

Amiravo yeemenle va, amiravo paahi, khino a iyaakha, muloko ni thanu na tthaaru miloko miili, khino alaleyi anrowa okhumelela, kinsuwela sayi? Khino okhuma vaavo onoorowa misiyonaariyu onrowa omwaleela olumwenku. Khino mwa aximiravo awo sinookhuma soovaha sinrowa ovenxerya minepa

ikonto sene wa Kristu, ni nyuwo mwahikhala-wo nihiku awo jaarwiiy'aya waltaari. Okathi zeeni wooreerexa.

<sup>275</sup> Nrowe nuurame miru sahu vano, kivahereryaka nivekelo. “Khaavo onrwa wa Miyo,” ohimye ti Yesu, “vahikhanle wira Atithi Aka anoomuruuha toko. Ni othene ale anoorwa wa Miyo, Miyo hata mano nkinaarihela ota. Murwe wa Miyo nyuwo othene mulemeliwe ni muhaaxiwe. Miyo kinimoomumulihani.”

Pwiya, ala ari va. Awo ahoorwa okhala wira Nyuwo murimwaaruma orwa. Eroho Yowarya mmurimani mw'aya erooweettiha ni owiihana, vano awo khurwa. Awo yeemenle waltaari nno, oolapa, oowuurama miru, etthunaka osarihiwa Eroho Anyu ya Yawinyu—oreera Wanyu murima. Mwaasarihe, Pwiya. Mureerihe makhalelo aya. Mwaarume erowe mmatta m'ohepha, athu ala yeemenle va alipelelaka. Pooti okhala owaani. Pooti okhala ilapo s'okhopela. Pooti okhala nipuro nlo, masi wookhala ohepha olikanne wira wiiriwe.

Pwiya, kinvekela wira Nyuwo mureerihe minepa saya, ni mwaasarihe Eroho, mpakha awo ekhale miyaapu Sanyu soothanliwa: khino mwaneene etthoko muthiyana wira aaphwanye anawaattamanani, khino mwanamwane wira amuhimyeerye Yesu mwanamwane mwamuthiyana oxikola, khino mmiravo wira akuxe Ehapari yooreera mpakha oMeexiku, ilapo sikina s'okhopela nipuro nlo. Munivahe, Pwiya. Mutokweene wira alavule vanlothoni v'ephiro ni muxirikh'awe, khino nipuro nikina: mulopwana a okaafirika ni mukhulupale awe, wala ale ari mukaafirika. . .Nyuwo munuwela, Pwiya. Kinvekela wira Nyuwo mwaasarihe naanaano va, oreera Wanyu murima ni omoriwa ikharari.

Awo ahoorwa; koosuwela wira Nyuwo moowaakhela, okhala wira Nyuwo moohimya wira, “Ole onrwa wa Miyo, hata mano nkinimurihela ota. Ole onikihimya ohoolo w'athu, Miyo kinoomuhimya ohoolo w'Atithi Aka, ni Malaikha oowaarya.” Tivo, awo ari va yeemenle-ene v'atthuni wira elape: wira yaahivonya. Awo antthuna ekhale oratteene. Nyuwo muwaakhele, Tithi. Kinvekela wira Nyuwo mwaareerihe, ni mwaakhalihe an'Inyu okhuma okathi yoola mpakha ohoolo, mwa Nsina na Yesu Kristu. Amen.

<sup>276</sup> Muluku ooreeriheni, khula mmosa a nyuwo. Mwaakhele Eroho Yowarya. Vano, murowe naanaanoru musaala weiwo onrow'ahu woophwanyani ottuli nno, ni omwiixaatherya matata khula mmosa a nyuwo, wira nivekele. Ottuli wenna nno, mutthikeke. Yookhala esaala evaheriwe ottuli nno, weiwo onrow'anyu okhala okathi vakhani paahi ottuli iwe wa o—osarihiwa woomalela. Mukokhore; mmuxukhuru Muluku mwaha wo owoopolani. Mwiixaatheriwe matata ottuli iwo mwaha wa simphavel'anyu, ni wa Eroho Yowarya. Muluku ooreeriheni. Areerihwe mai ula mwaamukhaani, othene ale

anrowa yaakunxe-ene axinamwane aya, ni tiithi aavaaveryaka maihi a mwan'awe, asuwelaka wira owo onnisuwela nave wira nihiku nimosa onoowerya omuleela mwaamukhaani awe wira, hiyo naari vamuthukumanoni vale weiwo awo jaarwiiy'aya w'Apwiya Yesu. (*M'oreerani Okathi Onirwa.*)

Wookhala muttethe ori wooreera ovikana  
othana,

Nto mwa waamini ninniwerya woona  
ottaiwene.

Maana Atithi annilipelela mphironi,  
Wira anitthokiherye nipuro n'okhala Iwe.

M'oreerani okathi onirwa,

Oh, ninookumana opatari iwe wooreera.

M'oreerani okathi oni . . .



*NROWE NIMOONE MULUKU* EMK59-1129

(Let Us See God)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku oxekuwa, mahiku yeettaka 29 mweeri wa Novembro, 1959, oFeera wa Muttethe Santa Clara oSan Jose, California, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)